

# *DITIRAGALO DI*

## *HLAKIŠWA KE SEP PROFETO*

 A re inamišeng dihlogo tša rena bjale bakeng sa thapelo. Morena Modimo wa rena, Mohlodi mogolo wa Magodimo le lefase, Yo a tlišitšego Jesu gape go tšwa bahung, le go phela le rena lebaka la mengwaga ye ye dikete tše pedi, go phela go ya go ile go tiišetša Lentšu la Gagwe le go Le dira therešo go moloko wo mongwe le wo mongwe. Re leboga kudu bakeng sa Bogona bjo Bokgethwa bja Gagwe feela bjale, go tseba se, gore re na le netefatšo ye kgolo ye, gore morago ga ge bophelo bjo bo fedile, re na le Bophelo bjo Bosafelego ka go lefase la go tlo tla. Re a Go leboga, ka se, Morena. Gomme kholofelo yela, kgwaparetšo go soulo, go rereša le ye e tiilego ka nako ya ledimo. Gomme ge madimo a etla, maphotho a magolo a tokologa, re ikwela gore ka tumelo ka go Yena re sabola lephoto le lengwe le le lengwe.

<sup>2</sup> Modimo, re thuše bošegong bjo ge re etla go direla balwetši le bahloki. Re a rapela, Modimo, gore go ka se be motho wa go babja magareng ga rena ge re tloga bošegong bjo. A nke motho yo mongwe le yo mongwe a fodišwe ke Maatla a Gago a Makgethwa, bobedi mo le go kgabaganya setšhaba, sa kgokagano, a nke go se be motho wa go fokola go ya ka ntle ga moago ofe kapa ofe goba kgobokano efe kapa efe bošegong bjo. A nke Moya wa Gago o ba fodiše. A nke Letsatši le legolo la toko, ka phodišo ka diphegong tša Gagwe, le hlabe, le romele mahlasedi a tumelo ka go pelo ye nngwe le ye nngwe ge ba theetša Lentšu, go bona diponagatšo tša Moya wo Mokgethwa go ba kgodišo gore O sa phela. Re rapelela ditšhegofatšo tše, Tate, ka go la Jesu Leina. Amene.

Le ka dula.

<sup>3</sup> Ka nneta re tše wo go ba monyetla wo mobotse go ba mo bošegong bjo, gape, go—go bolela le batho le go rapelela balwetši. Re rata go dumediša bao ba lego ntle ka go naga ya di—di dikgokaganya tša mogala go kgabaganya setšhaba, gape bošegong bjo. Gomme kafao re a rapela gore Modimo o tla šegofatša yo mongwe le yo mongwe wa lena, go tshepa gore bohole ba ba amogelago Kriste mosong wo ba tla tlatšwa ka Moya wo Mokgethwa gomme ka mehla ba phela go botega le therešo go Yena go fihla bophelo bjo bo fedile mo lefaseng, bophelo bjo bo hwago bjo. Gomme ka gona ba, ka go dira seo, ba na le Bophelo bjo Bosafelego. Ba ka se tsoge ba hwa ka go lebaka le le tlago, go ya go Lebaka le legolo leo bohole re le lebeletšego pele.

<sup>4</sup> Bjale re ya go re, ge ke sa nagana ka lona, e sego go tsenatsena. Ngwanešu Vayle o mo, gomme nka no se mmone. Ke

tla... A nka romela sengwalwa sela pele go wena ge ke fihla morago Tucson? Ke e lebelela godimo, ga se ke e bale yohle bjale, gomme ke tla e romela morago go wena ka pela ge ke fihla Tucson.

<sup>5</sup> Bjale ke nyaka go dira tsebišo. Ye ke ya gagolo dikereke kae kapa kae, gagolo ka Bodikela, goba e ka ba kae ba nyakago go tla. Ngwanešu wa go hlomphega wa rena, Ngwanešu Pearry Green, le... Ke monna yo a lego mothomi wa kgokagano ye ya mogala mo. Morena o e beile godimo ga pelo ya gagwe go tla go re etela mo Tucson, le go thoma tsošeletšo ka Tucson, ye ka kgonthre re e hlokago. Gomme Ngwanešu Pearry o tla be a le ka Tucson. Ge o nyaka go mo kgwatha, e no swarana le ofisi ya rena kua. E tla be e le Agostose la 10, 11, 12 le 13. O bile le yona pelong ya gagwe lebaka le letelele, gomme ke mmoditše “go na le tsela e nnoši go e tloša pelong ya gago, eya o e dire.” Gomme ke ngwanešu wa Mokriste, mohlanka wa kgonthwa Modimo. Gomme lena batho, ka Tucson, ke a tseba re tla šegofala ge a direla kua felotsoko, mohlomongwe ka Ramada Inn goba e ka ba kae Morena a tla fago lefelo, ga se a be a ba nalo godimo mo. Eupša ke a tseba le tla šegofala ka go tla, go kwa Ngwanešu Green ge a tlharolla go rena Lentšu la Modimo, mohlomongwe go rapelela balwetši, goba e ka ba eng e robetšego ka mošomong wa tlotšo ya Modimo go ka dira.

<sup>6</sup> Gape re nyaka go leboga Ngwanešu Orman Neville, Ngwanešu Mann, ka nako ye kaone ye ya kopanelo le bona. Ke leboga gakaakang go ba ba, go amana le monna yo bjalo ka Ngwanešu Neville, Ngwanešu Mann, le bohle badiredi ba bangwe ba tikologong mo. Ke a nagana ba lemogilwe. Ge o se wa dira, ka poto ya rena le kereke ye rena mo, ke na le nnete Modimo o a le lemoga mo bjalo ka bahlanka ba Gagwe. A nke Morena a le šegofatše ka mehla.

<sup>7</sup> Bjale, ke kgopetšwe se sengwe se sennyane mo, go noute ye nnyane ke e filwego, go... Ba bile le kopano ya bahlokomalaphahlo bošego bjo bongwe mo, go poto ya bahlokomalaphahlo le matikone, gomme ke a nagana metsotso e badilwe mosong wo pele ga kereke. E lego, ke mokgwa wa rena go dira seo. Ka go diphetho tše di dirilwego ke poto ya bahlokomalaphahlo le matikone mo ka kerekeng, nnete, e ka se kgahle yo mongwe le yo mongwe. Re ka se kgone go dira seo. Ga ke ne selo se tee go dira le poto ya bahlokomalaphahlo goba poto ya matikone. Ebile ga ke ne bouto ntle le ge go le tekatekano, gomme ke swanetše go ba mo go e dira nako yeo, Ngwanešu Orman Neville a tšeа boute ya bobedi. Gona re swanetše go saena tše, gobane re karolo ya kereke. Eupša eng kapa eng poto ya bahlokomalaphahlo le sona sephetho sa dipoto ba se dirago, ka nnete re ema ka morago ga bona lekgolo le tee la phesente, ka gobane ke se ba lego mo ka sona. Gomme diphetho tše bona ke gare ga bona le Modimo. Nka se kgone, se kgone gomme nka se

ke, ka mokgwa ofe kapa ofe, kgahlanong le sephetho seo. Gomme selo se sengwe, ke ganetšwa ke Mmušo wa United States go dira sephetho e ka ba sefe malebana le seo, kafao ka kgopelo le se nkgopele go phošolla diphetho tša bona. Nka se kgone go e dira, gomme nka se kwe selo ka sona. Le a bona? Kafao le se nkgopele go phošolla diphetho tša bona. Le a bona poto, ke yona e dirilego diphetho. Go lokile.

<sup>8</sup> Ka go tiragalo ya kopano ye e tlago, go a kgonega, ge Morena a rata, ke tla be ke etla morago mo ka go e ka ba dibeke tše nne goba tše tshela, goba se sengwe bjalo ka seo, mohlomongwe bakeng sa kopano ye nngwe ya Lamorena. Gomme ke tsebišitše mosong wo ke be ke nyaka go bolela ka *Modimo O Bonagatšwa Ka Go Lentšu La Gagwe*, gomme nka se no ba le nako bosegong bjo, gomme, gabotse, ga ke ne lentšu go lekanelo go e dira. Gomme ka gona lešaba, go nyakile go ba ba bantši ka ntle go swana le ba ba lego ka gare, gomme, mohlomongwe go fetiša, go bala dipese tše le ditheraka le dilo tše di dutšego ntle kua le batho. Ba buletše, kgašo ye nnyane e gatetše godimo gannyane, re kgona go ekwa. Lephoto le lennyane le, lephoto le lekopana go tšwa tabarenekeleng, re kgona go topa leo godimo bokgole bja poloko ya toropokgolo. Gomme tše dingwe tša difatanaga di dipoloko tše mmalwa bokgole, mothaladi wa difatanaga, go ya godimo le fase, le go dikologa le go kgabola mekgotha, go dikologa tabarenekele bosegong bjo. Ga ke dumele go nako efe kapa efe, ka ponagalo, re kilego ra ba le batho ka go fetiša ba pitlagane ka gare le tikologong ya kereke go feta re nago bosegong bjo. Kafao re... Gomme bontši, bontši, bontši ba no otrella godimo le go otrella go tloga.

<sup>9</sup> Kafao go ya go laetša, "Mo go lego Setoto, dintšhu di tla kgobokana." Gomme a nke ke re go lena bosegong bjo, ka go sehlopha se sennyane se sa batho, ke kopano ya ditšhabatšhaba. Ka kgonagalo ka godimo ga pedi tharong ya dinaga tša kopano ye e emetšwe mo, ka ntle ga dinaga tše tlhano tša ntle, ebile le go Russia, le gohlegohle dikarolo tša go fapana tša naga. Tsela tlase go ya ka Venezuela, ntle go ya ka Jamaika, gohlegohle dikarolo tša go fapana tša setšhaba, batho ba mo, ba swaretšwe Modimo ke tlala le lenyora. A nako ye botse!

<sup>10</sup> Bjale ke nyaka, pele ke bala Beibele, gomme a le tla nthapelela bjale. Ke—ke ya go leka go tliša Molaetša wo monnyane, Morena ge a rata, ka maleba a phodišo Kgethwa. Ka gore, mosong wo re boletše ka phološo. Gomme bosegong bjo re ya go bolela metsotsa e se mekae ka phodišo Kgethwa, gomme ka gona re bitše mothalo wa thapelo le go rapelela batho. Ge re sa dira se, ntle ka dikgokaganong, kae kapa kae le lego, le ka ntle ka dipeseng le dikoloi tikologong, bokagare ga poloko goba tše pedi tša tabarenekele; ge go etla go rapeleleng balwetši, ge o sa kgone go tsena ka moagong... Moo, o ka se kgone, ke na le nnete bjale, gobane mejako gohle go pitlagane swine, go feta, gomme

ga go sekgoba felo, kafao le rapele le go beana diatla godimo seng sa lena ntle fao. Gomme a nke modiredi yo mongwe le yo mongwe a kgokaganego ka gare bošegong bjo, le yena a rapele phuthego ya gagwe ge ditirelo tša phodišo di tšwelapele. Re a dumela Modimo ke motlalagohle, mogohle. Bjale pele re bala goba...

<sup>11</sup> Pele re—re rapela, re rata go bala le lengwe la Lentšu la Modimo. Gomme ke fetotše Mangwalo a ka—a ka lebakana la go feta, ka gobane ke nyakile go fetola mohuta wa kopano wo ke bego ke o beile ka monaganong wa ka bakeng sa bošego bjo, kafao ke e fetotše nthathana ye nnyane; gomme kafao ke ile ka swanelwa ke go fetola Mangwalo a ka, e sego go a fetola, eupša go a bea ka peakanyo ye nngwe, ya phodišo Kgethwa, kafao gore—gore batho ba tla kwešiša.

A re phetleng go Mokgethwa Luka, tema ya 24. Gomme re tla thoma ka temana ya 12 ya tema ya 24, le go bala go theoga go ya go e ka ba 34. E ka go tsogo ya Morena Jesu.

*Nako yeo Petro, Petro a tsoga, gomme a kitima go ya lebitleng; gomme a inamela fase, gomme a bona mašela a diaparo . . . a maketše ka go yenamong ka se se bego se diragetše.*

*Gomme, bonang, ba babedi ba bona ba ile lona letšatši la go swana motseng wo o bitšwago Emause, e bego e ka ba botelele bja mašemo a masome a a tshelelaggo go tloga Jerusalema.*

Bjale, go tšea mašemo a lesome go dira—go dira maele, ka fao e be e ka ba dimaele tše tshela.

*Gomme ge ba be ba bolela mmogo ka . . . dilo tše di diregile.*

*. . . go diregile, gore, ge ba be ba sa boledišana mmogo le go fa mabaka, Jesu yenamong o batametše kgauswi, gomme a sepela le bona.*

*Eupša mahlo a bona a be a širilwe gore ba se kgone go mo tseba.*

*Gomme o rile go bona, Ke dipoledišano tša mohuta mang tše le nago natšo seng sa lena, ge le sepela, gomme le nyamile?*

*Gomme yo motee wa bona, yo leina la gagwe e lego Kleopa, a araba a re go yena, A o moeng o nnoši ka Jerusalema, gomme wena ga o tsebe dilo tše tše di tlilego tša phethego . . . ka matšatšing a?*

*Gomme o rile go bona, Dilo dife?*

Gomme elelwa, yo ke Jesu Yenamong, o tsogile, o a bolela.

Gomme ba rile go yena, Malebana le Jesu wa Nasaretha, e bego e le moprofeta yo maatla ka tiro le ka lentšu pele ga Modimo le batho bohle:

...ka fao baprista ba bagolo le babuši ba rena ba mo gafetšego go bo...go—go ahlolelwa lehu, gomme ba mmapotše.

Eupša re be re tshepile gore o be a le yo a bego a swanetše go lopolla Israele: gomme ntle ga seo sohle, lehono ke letšatši la boraro mola dilo tše di dirilwego.

Ya, gomme basadi ba bangwe ba rena le bona ba re makaditše, bao ba bego ba le lebitleng ka leselaphutiana;

Gomme ge ba hlokile mmele wa gagwe, ba tlie, ba bolela, gore le bona ba bone pono ya barongwa, bao ba rile...o be a phela.

Gomme ba bangwe ba bona ba bego ba na le rena ba ile lebitleng, gomme ba hwetša ebile go le bjalo ka ge basadi ba boletše: eupša yena ga se ba mmona.

Theetšang bjale; Jesu.

Nako yeo a re go bona, O mašilo,...pelo ya go tšwafa go dumela tšohle tše baprofeta ba di boletše:

A Kriste o be a se a swanela go tlaišega ka dilo tše, le go tsena ka letagong la gagwe?

Gomme a thoma ka Moshe le baprofeta bohle, a ba hlathollela tšohle, ka mangwalong ohle dilo tše di amago yenamong.

Gomme ba batamela kgauswi ka motseng, moo ba bego ba eya: gomme a dira mo o ka rego o be a sa ya pejana.

Eupša ba mo phegelela, ba re, Dula le rena: ka gore ke go batamela mantšiboa, gomme letšatši le fedile. Gomme o ile ka gare go leta le bona.

Gomme gwa direga, ge a dutše dijong le bona, o tšere borotho, le go bo šegofatša, le go bo ngwatha, gomme a ba fa bjona.

Gomme mahlo a bona a bulega, gomme ba mo tseba; gomme a timelela pele ga mahlo a bona.

Gomme ba boletše yo motee go yo mongwe, A dipelo tša rena ga tša ka tša swa ka gare ga rena, ge a be a bolela le rena tseleng, le ge a be a re bulela mangwalo?

Gomme ba tsogile ka iri yona yeo, gomme ba boela Jerusalema, gomme ba hwetša ba lesometee ba kgobokane mmogo, gomme ge ba be ba na le bona,

Ba re, Morena o tsogile ka nnete, gomme o bonagetše go Simone.

*Gomme ba boletše dilo tše di dirilwego tseleng, le kafao gore o tsebilwe go bona ka go ngwatha borotho.*

<sup>12</sup> Bjale a re rapeleng. Morategi Tate wa mogau, re leboga Wena ka Lentšu la Gago, ka gore Lentšu la Gago ke Therešo, Lentšu la Gago ke Bophelo. Gomme Wena, O Morena, le Lentšu la Gago le Batee. Kafao re a rapela bošegong bjo, Morena, gore O tla tla magareng ga rena ka maatla a tsogo ya Gago le gore o tla laetša pele go rena bošegong bjo, go swana le bale ba bego ba etšwa Emause, gore le rena re tla boela magaeng a rena, re re, “A dipelo tša rena ga se tša swa ka gare ga rena?” E fe, Morena, ke go batamela mantšiboa gape. Ka gore re e kgopela ka go la Jesu Leina. Amene.

<sup>13</sup> Bjale ke nyaka go bolela mabapi le Beibele ye. Gomme thuto ya ka bošegong bjo, ya hlogotaba, ke: *Ditiragalo Di Hlakišwa Ke Seprofeto. Ditiragalo Di Hlakišwa Ke Seprofeto.*

<sup>14</sup> Bjale, Beibele ke Puku ya go fapana go tšwa go dipuku tše dingwe tšohle tše kgethwa. Beibele ke Puku ya go fapana. Ke Puku ya seprofeto, e bolellapele ditiragalo tša moso. Gomme gape Ke Kutollo ya Jesu Kriste. Tsela yohle go tloga go Genesi go ya go Kutollo, e Mo tliša ntle ka Botlalong bja Gagwe, se A bego a le sona le se a lego. Gomme Puku ka moka go felela, Kutollo 1:1 go ya go 3, e rile Puku ke Puku ya “Kutollo ya Jesu Kriste,” e lego Lentšu la Modimo. “Kutollo ya Jesu Kriste,” Lentšu la Modimo!

<sup>15</sup> Bjale, dipuku tšohle tše dingwe, dipuku tše kgethwa, e no ba mokgwa wa boitshwaro, mokgwa wa maitshwaro, goba mokgwa wa thutamodimo. Sengwe seo . . . Ke ba bakae ba kilego ba bala Korana, Beibele ya ba Mohammedan, le—le puku ya ka Babudda le go ya pele? E no ba mokgwa wa maitshwaro, se batho ba swanetšego go phela, ka fao batho ba swanetšego go phela, eupša ga e profete, ga e bolele e ka ba eng ka dilo tše goba ka dimpho e ka ba dife di filwego go e ka ba mang kapa mang, eng kapa eng e ka diregago. Go no swana le go tšoena lefelo la marobalo goba se sengwe. Kagona, ge dikereke di etla go lefelo mo di dirago kereke ya bona feela lefelo la marobalo go le tšoena, gona di tšwele go Lentšu la Modimo.

<sup>16</sup> Ka gore Beibele ke bja go phela, bohlatsé bjo bo boleletšwegopele bja Jesu Kriste. Gomme bjalo ka ge lefase le goletše ka go botlalo bja lona, gomme gape merara e golela ka go botlalo bja lona, letšatši le golela ka go botlalo bja lona, Beibele e bonagaditšwe ka go botlalo bja Yona ka go Motho wa Jesu Kriste. O be a le Lentšu la Modimo le utolotšwe, Puku ya Topollo e feletše ka moka. Beibele ke Lentšu la Modimo, le bolellapele ditiragalo tša ka moso. Badumedi ba yona ba laelwa ke Mongwadi wa Yona go bala le go dumela Lentšu le lengwe le le lengwe la Yona, e sego feela karolo ya Lona. Lentšu le tee, go se Le dumele, o ka no tlogela go leka go fihla o dumela Lentšu leo. Lentšu le lengwe le le lengwe ke karolo ya Ramaatlakamoka

Modimo go felela; Modimo o dirwa go bonagala, a tatagana ka go Lentšu la Gagwe, go laetša pele Yena ke Mang. Re a laelwa, bjalo ka badumedi, go dumela Lentšu le lengwe le le lengwe la Yona. Gomme E ngwadilwe ke Mongwadi Modimo Yenamong. Ga go mang a ka oketšago eng kapa eng go Yona goba a fokotša eng kapa eng tšwa go Yona. Ge o ka dira, e tla šešerekanya mmele wa Modimo. O tla ba le, mohlomongwe go swana le menwana ye tshela godimo ga seatla se tee, goba—goba matsogo a mararo, goba se sengwe, go oketša se sengwe, go tloša se sengwe go tšwa go wona le go hloka letsogo le tee, go hloka monwana o motee. Ke Mmele wa go felela wa Jesu Kriste. Gomme ka go Kriste, ka go ba Monna, Monyadi, Monyalwa o emetšwe ka go Yena le yena. Gomme ba babedi ba ke o Tee. “Letšatši leo le tla tseba gore Ke ka go Tate, Tate ka go Nna, Nna ka go lena le lena ka go Nna.” A seswantšho sa go felela!

<sup>17</sup> Gomme badumedi ba therešo ka go Lentšu le, ba ba Le amogetšego ka tsela yeo, ba a Le dumela, gomme ka kgotlelelo ba letile ditshepišo tše di tshepišitšwego tša Lona, ye nngwe le ye nngwe ya tšona go bonagatšwa ka go lebaka la yona. Modumedi yo mongwe le yo mongwe o le šeditše. Modumedi yo mongwe le yo mongwe a bego a eme ka dinenenkisane, a šeditše, ke yena yo e utolotšwego go yena.

<sup>18</sup> Bjale lebelelang ka matšatšing a go tla ga Morena Jesu. Gobaneng batho bale ba se ba lemoga Johane, ge Beibebe pepeneneng e boletšwe ke Jesaya, “Go tla ba lentsu la yo a goeletšago ka lešokeng, ‘Lokišang tsela ya Morena’”? Mopropfeta wa bona wa mafelelo ba bilego nae, e lego Maleaki 3, o rile, “Bonang, Ke roma motseta wa Ka pele ga sefahlego sa Ka go lokiša tsela.” Gobaneng ba se ba e bona? Ka gobane ba be ba lebeletše godimo ga se sengwe se se dirilwego, ba theile megopololo ya bona godimo ga molaetša wo mongwe wo o tšwetšego ntle pele ga nako, gomme ba paletšwe ke go bona ponagalo ya Modimo ya bjale ka go letšatši le ba bego ba le phela.

<sup>19</sup> Gomme Bakriste, mogohle, seo ke tlwa mo lefase le emego bošegong bjo. Ntle le thulano, yeo ke therešo! Bakriste, mogohle, ba leka go lebelela morago go mokgwa wo mongwe wa maitshwaro woo Mna. Luther a o ngwadilego, goba Mna. Wesley, Sankey, Finney, Knox, Calvin; woo, ga go yo mongwe wa rena a ka kgonago go bolela gampe ka wona, eupša e bile ka letšatši le le fetilego.

<sup>20</sup> Bafarisei ba lebeletše morago go bona se Moshe a se boletšego, gomme ba rile, “Re na le Moshe. Ga re tsebe mo O tšwago.”

<sup>21</sup> Eupša elelwang, ge Moshe mo, ba be ba sa tsebe mo a tšwago. Le a bona? Gomme bjale ba... Ga go makatše Jesu o rile go bona, “Le tlokile mabitla a baprofeta, gomme ke lena le ba beilego ka kua.” Morago ga ge Molaetša wa bona o ile! Molaetša o ya go

kgabola, batho ba a O bona, ba dira metlae ka Wona (lefase le a dira). Gomme morago ga ge motseta a feditše le Molaetša o fedile, nako yeo ba aga kereke ya leina godimo ga Molaetša. Gomme fao ba a hwa, thwi fao, ba ka se tsoge ba tla Bophelong gape.

<sup>22</sup> Lebelelang nakwana feela, go ba bangwe ba lena batho, gomme gagolo ke bolela le lena batho ba Katoliki. A le a lemoga, a le kile la bala ya nnete histori, histori ya kereke ya Roma ya Katoliki? Kafao go go hwelatumelo ya lena, ge e sa le go tloga ka Mokgethwa Augustine wa Hippo, ke dimilione tše kae tša batho ba go hloka molato bao kereke e ba bolailego! Ke lebetše, nka se kgone go bitša nomoro ya maleba, eupša e godimo ka go dimilione, ge e sa le go tloga ka Mokgethwa Hippo wa... Mokgethwa Augustine wa Hippo...wa Hippo, Afrika, o e dirile pego e be e le thato ya go felela ya Modimo go bolaya yo mongwe le yo mongwe a nganganago le kereke ya Roma ya Katoliki. A le a lemoga gore ka go seo, gore Mokgethwa Patrick ga se a ke a tsoge a lemogwa go fihla ka morago ga lehu la gagwe, bjalo ka Mokatoliki wa Roma? O ngangane le mopapa le ditiro tšohle tša gagwe, gomme kereke ya Katoliki yonamong e bolaile dikete tše masome tša bana ba gagwe. A le be le tseba gore kereke ya Katoliki e tšhumile Joan wa Arc, mosadi yola yo mokgethwa yo monnyane, mo kwateng, ka go ba...ba rile o be a le moloi. Mengwaga ye makgolopedi moragorago, ba epolotše mebele ya baprista, ge ba hweditše ntle gore e be e le phošo, gomme ba e lahlela ka lewatleng, ntle le go ba boloka lefelong le lekgethwa, go dira boitsholo.

O se dire letšatši go feta ka godimo ga hlogo ya gago, le go ba lešilo.

<sup>23</sup> Ka fao bona baprista ba bego ba ka rata, bošegong bjo, go tla pele, bao ba ahlotšego Jesu. Selo se nnoši, ga se ba ke ba tsoge ba bona polellopele ya iri yeo. Ge nkabe...Jesu o rile, "Puruputšang Mangwalo, ka gore ka go Wona le a nagana," goba, a ke re, "le tleleima gore le na le Bophelo bjo Bosafelego, gomme Mangwalo ke wona a le botšago Ke nna Mang," go iri yeo.

<sup>24</sup> Elang hloko, Beibele ga e kgone go palelwa. Ke selo se tee E sa kgonego go se dira, Lentšu la Modimo, go palelwa, ka gore Le bolellapele ditiro tša Mongwadi wa Lona pele A e dira.

<sup>25</sup> Bjale, go na le sebaka se tee go sekete gore motho o ka dira polellopele gore se sengwe se ya go direga, gomme sa direga. Eupša ka gona ge a bea *fao* se yago go direga, seo se mo ripela fase go ya mohlomongwe go ba le sebaka se tee go tše dikete tše lesome. Ge a bolela *letšatši* le se yago go direga, se e ripa fase, sebaka setee go e ka ba milione. Le *yo* e yago go direga go yena, seo se e tliša fase dibaka tše dibilione.

<sup>26</sup> Eupša Beibele ye e go botša tlwa *mang, neng, kae*, le *eng* o ka se lebelelago, gomme ga se ya ke ya palelwa nako ye nngwe. Kafao, ka poledišanong ye nnyane e sego telele go fetile, le

moprista wa kereke ya Sacred Heart godimo mo; o rile, "Mna. Branham, o leka go phegišana le Beibele." O rile, "Yeo ke histori ya kereke."

Ke rile, "Ga se histori. Ke Modimo, Yenamong, ka mongwalong."

O rile, "Modimo o ka kerekeng ya Gagwe."

<sup>27</sup> Ke rile, "Modimo o ka Lentšung. Gomme eng kapa eng kgahlanong le Lona, a e be maaka. Ka gore O rile, 'A nke Lentšu la ka e be therešo gomme lentšu la motho yo mongwe le yo mongwe maaka.'"

O rile, "Ga ra swanela go ngangišana."

<sup>28</sup> Ke rile, "Ga se ka ke ka go kgopela go nganga, eupša Beibele e re, 'Etlang, a re faneng mabaka mmogo.'"

<sup>29</sup> E bolelapele ditiro tša Mongwadi pele A e dira. Kafao, go bolela seo, ka gona seo se bea monna yo mongwe le yo mongwe le mosadi, Lephekong la Kahlolo, ntle le maitshwarelelo a itšego. Ge o tsea se Methodist e se bolelago ka Lona, se Baptist e se bolelago ka Lona, se Katoliki e se bolelago, se Pentecostal e se bolelago, goba kereke ye nngwe le ye nngwe gape, le ka no hwetša manyami ka Kahlolong. Eupša ge le ka no šetša se Beibele e rego se ya go direga, le gore se direga neng, gona le tla lemoga se se diregago.

<sup>30</sup> Bjale, ga e thwi ntle ponagalong ya molaleng moo batho bohle ba ka kgonago go e bona, ka gore Jesu o lebogile Tate go e uta go tloga go mahlo a bahlale le dihlalefi, gomme o tla utolla go masea ao a tla ithutago. Naganang ka Modimo Ramaatlakamoka a dutše ka Lentšung la Gagwe Mong, ka maatla a go foufatša bahumi le ba babe le—le dirutegi tša go rutega, go foufatša mahlo a bona gore ba se kgone go Mmona, le go bula mahlo a bahloki le baserutege.

<sup>31</sup> Elang hloko batho ba ba tšwago Emause, O rile ya bona-kwešišo ya bona ka Yena e be e širilwe. Ba boletše le Yena gomme ga se ba ke ebile ba tseba gore O be a le mang, botelele letšatši lohle. Modimo o kgona go dira seo, ka gore Yena ke Modimo.

<sup>32</sup> Ke tlwa se A se dirilego go baprista bale, bale ba mangwalo, ka gobane Go ngwadilwe gore O be a swanetše go dira seo. Modimo o foufaditše mahlo a bona gore re be le sebaka. Elang hloko, ga se ba kgona go bona, ga go kgathale dirutegi gakaakang, e be e le baprista gakaakang, tše ba di dirilego, ba be ba no se kgone go Le bona, ka gobane ba be ba foufetše. Pono ya bona e ka no ba e be e le masomepedi—masomepedi, mmeleng. Eupša pono ya bona ya semoya!

<sup>33</sup> Selo sa go swana ke be ke leka go se bolela mosong wo ka bootswa bja basadi, go apara ka tsela ye ba dirago bjale. Ke diotswa. Ka Pukung ya Modimo ba na le molato wa bootswa nako le nako ge ba apara diaparo tša go lebega thobalano. Soulo

ya bona, ga ba e tsebe. Ke a dumela bona basadi, bontši bja bona, dikete tša bona, ga ba ne molato, gomme ba ka se dire bootswa le ka mokgwa ofe. Gomme basadi ba go šokiša, ka yo mongwe yo a tla ba dumelago ba feta le yona, ntle le go e senola le go bolela therešo, o dira bootswa. Bjoo, Beibele e rile, “Seotswa se se dutšego godimo ga meetse a mantši, seo dikgoši tšohle tša lefase le batho ba lefase, dikereke le go ya pele, ba dirile bofefe bja semoya le yena. Gomme o be a le MMAGO BOMMALEGOGWANA,” dikereke tša maina.

<sup>34</sup> Re hlokomela Beibele, ka gore Modimo ga a re tlogele leswiswing. O re rometše Beibele go re botšapele ditiragalo pele di be di tla direga, le yona tlhago le nako di tla tlago.

<sup>35</sup> Bjale, ke se sengwe go swana le go lebelela khalentare go bona ke letšatšikgwedi lefe. Ge o nagana, o bolela gore ke Mokibelo wo, Lamorena, ke eng? Lebelela godimo ga khalentare. Khalentare e tla go botša ke letšatši lefe. Ge o bona ditiro tša batho, mohlomongwe ba eya kerekeng, o bona di—di . . . o kwa dipele di lla, o makala ke letšatši lefe. Lebelela khalentare, e tla go botša ke letšatši lefe.

<sup>36</sup> Gomme ge o bona kereke e eba bolefase, go swana le ge e bile ka matšatšing a Sodoma, go bona kereke ya lefase yohle e eya ka go . . . e rapela “modimo wa lebaka le lebe le,” le go bona seo; ka gona go bona sehlopha se sennyane ba sego nene ba bothana ka fase ga tšhušumetšo ya Modimo, ba tšweletša gape Bophelo bja Jesu Kriste, ka Mangwalo ao a swanetšego go direga, o tseba iri ye o phelago ka go yona.

<sup>37</sup> Beibele ye e bolellapele, ka seprofeto, letšatši le re phelago ka go lona, le gore ke nako mang re phelago ka go yona, gomme ke ditiragalo tša mohuta mang di swanetšego go phethega. E e bolellapele thwi semelong, gomme ga se nke ya fetwa ke lebaka le gatee, ka dinako ka moka. Ga se nke le gatee E e foša, gomme E ka se ke, ka gobane ba ba kgethetšwego pele go e bona ba tlo e bona. Jesu o rile, “Ga go monna yo a ka tlago go Nna, ntle le ge Tate wa Ka a mo goga, gomme bohle ba Tate a Mphilego bona ba tlo tla.” Ke Lentšu le kopana le Lentšu. Ga go se sengwe le ka se dirago. Re a tseba, letšatši le re phelago ka go lona.

<sup>38</sup> Eupša bjalo ka ge go bille ka go lebaka le lengwe le le lengwe, batho ba dumelala banna ba bea ditlhathollo tša bona beng go Lentšu le, le go ba foufatša go tiragalo ye e diregilego. Selo sa go swana e se dirilego ka Bafarisei le Basadutsei. Le ge Paulo a eme kua le go leka go tsopola Lengwalo, gomme monna yo motee o mo gatlie ka sefahlegong ka gobane o biditše moprista mogolo leboto le le šweufaditšwego. Gomme ka gona ba fošitše go bona Modimo a tiišetša Lentšu la Gagwe le le profitilwego.

<sup>39</sup> Le a bona, Beibele ga e ikganetše Yonamong; Beibele ke Modimo. Ga go go ganetšana ka go Modimo; O phethagetše.

<sup>40</sup> Eupša batho, ka ditlhathollo tša bonabeng! Bjale elang hloko, a ke le laetseng, bagwera. Dikereke ga di kgone go dumelana tšonabeng ka tlhathollo ya Yona. Methodist ga e kgone go dumelana le Baptist, Baptist Presbyterian, Presbyterian Mapentecostal. Gomme le e ka ba mekgatlo ya go fapano ye masomenne ya Pentecost, ga e kgone go dumelana seng. Kafao le a bona, yeo e tla ba Babilonia gape, tlhakahlakano.

<sup>41</sup> Eupša Modimo o dira tlhathollo ya Gagwe Mong ya Lentšu la Gagwe. O tshepišitše selo se, le go se dira Yenamong. O a fa, Yenamong, tlhathollo ya sona, ka gobane O itira Yenamong go tsebja ka go iri yeo. Mme—mme Mmele wa Kriste o tšwetše pele bjang, go tloga maotong go ya hlogong!

<sup>42</sup> Elang hloko, gona ke lebaka leo batho ba ba štwago go e hwetša, ka gobane ba theetsa se yo mongwe gape a se bolelago ka Yona, go na le go bala Lentšu bjalo ka ge Jesu a ba boditše go dira, “Gomme ke Wona A pakago ka Nna. Puruputšang Mangwalo, ka go Wona le nagana le na le Bophelo bjo Bosafelego, gomme ke Wona A pakago ka Nna.” Ka mantšu a mangwe, theetsa, “Eng? Balang Mangwalo gomme le bone se Mesia a swanetšego go se dira. Go bona nako ye Mesia a bego a swanetše go tla. Lebelelang ke mang a bego a eya go etapele Mesia. Lebelelang iri. Go swanetše go ba lentšu la yo a goelelago ka lešokeng, Johane. Gomme le mo dirile tlwa se le boletšwego. Lebelelang se Ke swanetšego go se dira ge Ke etla. Gomme bjale le dirile eng? A Ke šitilwe go phetha Se?” Le a bona, Jesu o a bolela, “A Ke šitilwe go phetha Se?”

<sup>43</sup> Elang hloko, ge re etla go theoga go kgabola Mangwalo morago ga sekgalela se, kafao gore se sengwe le se sengwe sa go profetwa ka Yena se diregile feela tlwa ka tsela ye se bego se swanetšego. Ba be ba swanetše go tseba tiragalo ye. “Lehlanya le, Moisa yo moswa o phagamile, a ka ba mengwaga ye masometharo tharo bogolo gomme...goba mengwaga ye masometharo bogolo, gomme o ile tlase kua le go tleleima mehuta yohle ya Dietša, le Maeba a rotoga. Gomme, gabaneng, e be e no ba di—di dihlong.” Ba rile, “O tswetšwe ke batswadi ba go se be molaong, ba tleleima O tswetšwe ka tswalo ya kgarebe.”

<sup>44</sup> A ba be ba se ba swanelo go tseba gore Jesaya o rile, ka go Jesaya 9:6, “Re tswaletše Ngwana”? A ba be ba sa swanelo go tseba gape gore mopropeta Jesaya o rile, “Kgarebe e tla ima”? Ba be ba swanetše go be ba tsebile dilo tše. Eupša, le a bona, selo sa yona e bile, ba be ba e beela felotsoko tsela pele. Gomme Monna yo, go bona, ga se a lekanelo dinyakwa. Eupša O ba botšišitše, “Puruputšang Mangwalo, ka gore le nagana ka go Wona le na le Bophelo bjo Bosafelego, gomme Wona ke sona Selo se se pakago Molaetša wa Ka.” E sego se moithutamodimo ofeng a se boletšego; eupša se Modimo, Lentšu la Gagwe Mong, le rilego se tla direga! Amene!

<sup>45</sup> Kafao go bjalo bjale! Puruputšang Mangwalo, ka gore Ke Wona a re botšago iri ye re phelago ka go yona, a re botša tlwa se se tla diregago ka go letšatši le. Ke Wona le swanetšego go itshama ka wona, ka gore Ke Wona a pakago ka Motho Jesu Kriste. Ka gore Beibele e boletše, gore, “O a swana maabane, lehono, le go ya go ile,” ka gobane Yena ke kutollo ya Lentšu ka go lebaka. Go ka se fapané.

<sup>46</sup> Ka gona ka go theetša tlhathollo ya monna, ba bona tiišetšo ya Lentšu la Modimo e phethagaditšwe, ba šitwa go Le bona. Ka gobane, e ya pele nako yohle, eupša ka gobane ba theetša . . . Gomme Jesu o rile, “Ke baetapele ba difofu.” Gomme ge sefofu se hlaha sefofu, go direga eng ka bona? Bjale elelwang, Beibele e boleletšepele gore lebaka le la bodumedi la Lebaka la Laodikia le be le foufetše. Ba Mmeile ka ntle ga kereke. Ga go lebaka le lengwe, lebaka la kereke le lengwe, leo Jesu a bego a le ka ntle. Eupša Lebaka la Kereke ya Laodikia, O be a le ka ntle, a leka go tla morago ka gare, “Ke eme mojako ke a kokota.” O be a swanetše go be a le ka gare. Eupša O rile, “Ka gobane o re, ‘Ke humile, ke na le phahlo, ga ke hloke selo,’ gomme ga o tsebe, ga o tsebe gore o sefofu, se hlaha sefofu, o diila moyeng, o madimabe, o a šokiša, o a ponoka, gomme ga o tsebe e.” A see- . . . Ge motho a ponoka mokgotheng, a šokiša, a le sefofu, gomme a tseba o na le tlhaologanyo go lekanelo gore o ka mmotša o a ponoka, o tla leka go dira se sengwe ka yona. Eupša ge a šikinya hlogo ya gagwe, a re, “Nka se be le Lona. O mang go mpotša ke dire eng? Ke tseba mo ke emego.” Bjale, leo ge e se leemo la go šokiša, ga ke tsebe. Gomme seo ke tlwa se Modimo wa Beibele ye a rilego kereke e tla ba ka go sona, ka go lebaka le lebe le thwi bjale, ka go lebaka la mafelelo la kereke mo re phelago.

<sup>47</sup> Elang hloko, eupša go batho, “Ba bantši ba Ke ba ratago, Ke a ba sola.” Bjale, ge o solwa ke Morena, ka se o se dirago, tšwela ka ntle ga sona gona! Eya kgole le sona. “Ba bantši ba Ke ba ratago, Ke a ba sola.”

<sup>48</sup> Bjale, go boneng Modimo, bjale, go ka reng ge Bafarisei bale ba ka be ba rile, “Ema motsotsotso. Monna yola o re file tlhohlo ya kgonthe, O rile, ‘Puruputšang Mangwalo, ka gore ka go Wona le nagana gore le na le Bophelo bjo Bosafelego; A paka ka Nna.’ Go kaone gore ke lebelele morago ka go Mangwalo le go hwetša ntle se A swanetšego go se dira, Yena ke Mang, ke eng se swanetšego go direga. A ke swanetše go lebelela morago le go hwetša ntle”? Go na le seo, ba ile go baprista le go ba botšiša, “Go reng ka Lona?” A le bona phapano? Ba swanetše go be ba be ba bala Lentšu.

<sup>49</sup> Ka go Bahebere 1:1, Beibele e rile, “Modimo, dinakong tša kgale,” ke gore, “dinakong tša kgale le ka mekgwa ya go fapané o ngwadile Beibele ka baprofeta.” Bjale elang hloko, O ngwadile Beibele ka tsela ye e kgethilwego ke Yena Mong. Le a bona? Bjale, O be a se a swanela go E ngwala ka tsela yeo, e bile O be a se a

swanelo go phološa motho ka Madi. O be a se a swanelo go rera Ebangedi ka motho; O be a ka dumelela letšatši goba ngwedi goba dinaledi go rera Ebangedi, O be a ka dumelela diphefo go hama Ebangedi. Eupša O kgethile motho! Gomme O kgethile tsela ye Lentšu la Gagwe le tlilego, gomme e bile ka baprofeta ba Gagwe ba ba bego ba kgethetšwepele le go beelwapele, go beng karolo ya Lentšu la Gagwe, go bega kutollo ya Lentšu la Gagwe go lebaka leo le nako yeo. “Ka gore Lentšu la Modimo le tlie go baprofeta feela.” Ga se La ke la tla go moithutamodimo. Ntaetšeng Lengwalo. Le tlie feela go baprofeta. Modimo a ka se kgone go aketša. Kafao Modimo o ngwadile Beibele ka mokgwa wa Gagwe wo o kgethilwego, le baprofeta ba ba kgethilwego ba Gagwe Mong; e sego baprofeta ba motho a ba kgethilego, eupša baprofeta ba Modimo a ba kgethilego.

<sup>50</sup> Ka gona badumedi ba Lona ba šeditše phethagalo ya se moprofeta wa bona a se boletšego, gomme bjoo ke boitsebišo gore ke baprofeta ba Modimo. Ka gobane, sa pele, ba šušumeditšwe. Sa go latela, ba dula tlwa le Lentšu la iri. Ka gona seo ke maitsebišo a gagwe. Le a bona, re ile go kgabola seo Lamorena la go feta. Baprofeta ba bantsi ba maaka ba tla tsoga. Gomme re file tšhupetšo ya ka mo Biliama le Moshe, bobedi bja bona ba be ba tlodišwe ka Moya wa go swana, yo mongwe wa bona o rile, “Rena bohole re batee. A re kopanye, re bee basetsana ba rena le bohole mmogo. Re na le basetsana ba babotse godimo mo, gomme lena bašemane etlang godimo mo gomme le itšeeleng mosadi yo mobotse. Go lokile, bohole re batho batee, go le bjalo, morafe wa go swana.” Modimo ga se a ke a tsoge a ba lebalela sona. Ba theeditše seo.

<sup>51</sup> Le a bona, lefase le ba—ba batho ba hlokometše tsejana ya go tšwa, go feta ka thoko go gonyane go itšego, go kgaoletša tsoko go gonyane, eupša ga go ne go kgaoletša ka go Lentšu la Modimo. Go ne Phethene e tee. O swanetše go ithipa wenamong go lekana Phethene yeo, e sego go leka go ripa Phethene go lekana wena. Yo mongwe le yo mongwe o swanetše go dira seo. Yeo ke tsela e nnoši Modimo a nago le yona go e dira.

<sup>52</sup> Elang hloko bjale, badumedi ba letetše Lentšu leo go tiišetšwa. Le a bona, Lona ga se la ngwalwa ke motho, eupša Morena Modimo, ka fao Lona ga se puku ya motho.

<sup>53</sup> Yo mongwe o rile, “E no ba dingwalwa tsoko tša kgale tša Bahebere.” A Bahebere ba ka ngwala lengwalo le le bego le ahlola bonabeng? A setšhaba se sekaone sela sa Bajuda, sa go ipetla sonabeng le go pholetšhw, a ba ka ngwala makgopo a bonabeng, ba ikahlola bonabeng? Nnate aowa. Go bolela ka dibe tša gagwe mong, kafao ba ilego ka go rapeleng medimo, kafao ba dirile bofefe kgahlanong le Lentšu la Modimo? Aowa, aowa. Ba ka se tsoge ba bolela seo, setšhaba sela sa go ikgantšha.

<sup>54</sup> Ga se puku ya motho. Ke Puku ya Modimo. Gomme motho yo a bonago dipono goba go kwa Lentšu la Modimo, ga se a ke a le kwešiša (makga a mantši) bonabeng, ka go ditaba tše ntši. Le a bona? Motho ga se a ngwala Beibele. Modimo o ngwadile Beibebe. Ga se . . . Ga se puku ya motho. Ke Puku ya Modimo. Ke megopolo ya Modimo e hlagišwa ka dipounama tša motho. Seo ke se se E dirago Beibebe. Mogopolo wo o hlagišitšwego ke lentšu. Gomme mathomong go be go le Monagano wa Modimo, O O hlagišitše ka dipounama tša baprofeta ba Gagwe le go O tiiisetša ka bahlanka ba Gagwe. Le a bona? Elang hloko.

<sup>55</sup> Modimo o dira kgetho ya Gagwe Mong, ka kgethelopele, o kgethile baprofeta ka lebaka le lengwe le le lengwe. E eleng hloko. O beakanya tlhago ya moprofeta yola go swanela lebaka leo. Le a bona, O lekanya setaele sa gagwe, eng kapa eng a e dirago. O a mo lekanya ge eba o rutegile goba ga se a rutege. O lekanya dimpho, mokgwa wo a tla rerago ka gare, dimpho tše a tla bago natšo. Le Molaetša wa lebaka leo le itšego, Modimo o kgethetšepele selo se se itšego seo go direga gomme ga go selo se sengwe se ka kgonago go tšeag lefelo la sona. Ga go tshwenye ke eng, ke diphihlelelo tše kae tša madirwa ke motho, ga go selo se ka tšeago lefelo la sona. O kgethetše monna pele, mohlomongwe monna wa go se tsebe selo. A ka no ba a mo kgethetšepele mohuta wo mongwe wa monna. E ka ba eng a lego, O mo fa legoro la gagwe, mpho ya gagwe—ya gagwe, o mo fa tlhago ya gagwe, setaele sa gagwe, le e ka ba eng e lego, kafao a itlhagišago yenamong, le e ka ba eng a e dirago. O dira monna wa iri go swara batho ba iri. Nnete. O a e dira.

<sup>56</sup> Mafelelo a lebaka le lengwe le le lengwe, ge kereke e retologetše go lefase le sebe, gomme le go itshama godimo ga tlhathollo ya motho ya Lentšu. Bjalo ka mehleng, ka mehla ba, mafelelo a lebaka, ba tsena tlhakahlakanong ka baithutamodimo ba yona le baprista go fihla ka mehla e le tlhakahlakano. Ka mehla tlhathollo ya bona e fošagetše, ga go nako e tee e kilego ya šitwa go ba phošo. Gomme ga go nako e tee Lentšu la Modimo le kilego la šitwa go nepa. Yeo ke phapano.

<sup>57</sup> Bjale le a bona, Modimo o ngwadile Beibele, Yenamong. Bjale, Modimo o kgona go bolela. Moshe o rile O boletše le yena. Jeremia o rile, “O beile Mantšu ka molomong wa ka.” Gomme Modimo o kgona go ngwala. O ngwadile melao ye lesome ka monwana wa Gagwe Mong. O ngwadile godimo ga maboto a Babilonia. Gomme, elelwang, go Testamente ya Kgale e nnoši, makga a dikete tše pedi baprofeta ba rile, “GO RIALO MORENA!” Modimo o kgona go bolela, Modimo o kgona go ngwala. Nnete. E ka ba diphesente tše masomesenyane tša Mateo, Mareka, Luka, le Johane, ke wona Mantšu a Modimo Yenamong, Jesu Kriste a bolela. Kafao, ge Modimo a kgona go ngwala, ge Modimo a kgona go bala, ge Modimo a kgona go bolela, a A ka se kgone go dira ba bangwe go dira go swana?

A ga se a re go Moshe, “Ke mang a dirago motho semuma goba ke mang a mo fago polelo?” Modimo o ngwadile Beibele ka baprofeta, tsela ya Gagwe go e dira.

<sup>58</sup> Bjale nako le nako ge kereke e hlakahlakana (gomme Modimo o tsebetšepele ba be ba tla dira, ka gore O tsebetšepele dilo tšohle), kagona O na le moprofeta yo a itšego wa Gagwe o loketše lebaka leo, go bitša kgetho ya Gagwe ka Lentšu la Gagwe le le hlatsetšwego la maswao le dimaka, le tiišetšo ya Lentšu la Gagwe, “go tiišetša Lentšu ka dimaka di latela,” bjalo ka ge A tshepišitše. O fa tlhathollo ya therešo morago ga ge moprofeta yenamong a hlatsetšwe.

<sup>59</sup> Bohle eupša bao, bakgethiwa ba a romilwego go bona, ba a mo hloya. Bjale, hlahlofa tiragalo ye nngwe le ye nngwe gomme o bone ge eba ke therešo goba aowa. Feela bao A romilwego go bona! “O tlie go ba Gagwe Mong, gomme ba Gagwe Mong ga ba Mo amogele. Eupša ba bantši ba ba Mo amogetše, go bona O ba file maatla go ba barwa ba Modimo.” Elang hloko, aowa... tlhahlofo ye nngwe le ye nngwe ya Lentšu, ka go tiragalo ye nngwe le ye nngwe, le mafelelo a lebaka le lengwe le le lengwe goba sehloa goba magahlano, bjalo ka ge ke rerile ka yona makga a mantši.

<sup>60</sup> Lebelela go lebaka la Noage, go sehloa pele ga kahlolo. Go diregile eng? Noage, e bile feela lapa la gagwe le le dumetše monna. Ka moka ga bona ba mo swaswaladitše. Gomme o sentše lefase ka moka.

<sup>61</sup> Ka matšatšing a Abraham, ke sehlopha sa Abraham feela seo se dumetše. Ge Barongwa ba ile le go rerala Sodoma, ke Loto feela le mosadi wa gagwe le barwedi ba babedi ba tšwetše ntle, gomme o retologetše morago go pilara ya letsawai.

<sup>62</sup> Ka matšatšing a Moshe, ke feela bakgethiwa ba Israele ba tšwetše ntle. Gomme Farao o ile a mo hloya.

<sup>63</sup> Ka matšatšing a Eliya, se sengwe le se sengwe (go nyakile) ge e se banna ba dikete tše šupa, yo mongwe le yo mongwe wa bona o be a mo hloile, setšhaba sohle.

<sup>64</sup> Ka matšatšing a Jeremia, gobaneng, ba mo fošitše ka matata, le go mmitša lehlanya, ka gobane o robetše ka lehlakore la gagwe matšatši a mantši kudu, le ka lehlakore le lengwe, le—le go tše a dilo gomme o dirile dika. Ba ile ba mo hloya.

<sup>65</sup> Jesaya moprofeta, o ahlotše morafe wola kudu go fihla ba mo kgaola gabedi ka saga. Nnete.

<sup>66</sup> Johane Mokolobetši. “O be a le monna wa lebelete tlase kua, segafa tsoko sa go goelela.”

Bohle eupša—eupša barutiwa bale a ba neetše go Jesu Kriste bjalo ka kereke! Šeo. Johane o lokišitše batho. O be a na le ba bakae? O ka kgona go ba bala ka menwana ye mebedi... bobedi diatla, menwana ya gago, palo ye Johane a e neetše go

Jesu ge A etla. Bjale, go reng ka go Tla ga Gagwe ga bobedi? Nagana ka gona.

<sup>67</sup> Eupša ge badumedi ba therešo ba Beibele ba bona Lentšu le hlatselwa ka go bulega bjalo go lebaka, ba a dumela. Ga go tsela ya go ba tloša go Lona, ba a Le dumela. Ebile ba tswalela bopaki bja bona ka madi a bona. Ba a Le dumela. Nako yeo ke la bona, bakgethelwapele, bao go lebaka le itšego ba bonago le go dumela.

<sup>68</sup> Ba bangwe ba no se kgone go Le bona; ba foufaditšwe. Bjale, o re, "Ga ba kgone go Le bona." Bjale, go swana le Biliama, gobaneng Biliama a se a kgona go bona Leo? O be a le moprofeta, a tloditšwe. Gobaneng Farao a be a sa kgone go Le bona? Ge a bone seatla sa Modimo se etla fase le go dira mehlolo ka kua, go nno tiiša pelo ya gagwe. A ke mnnete? Gobaneng Dathane a se a kgona go Le bona, Mojuda yenamong? Ntle thwi kua, o tlide go kgabola Lewatle la go Hwa, le go ja manna bošego bjo bongwe le bjo bongwe, ao a bego a ewa boswa, gomme a no se kgone go Le bona. Gobaneng Kora a se a kgona go Le bona? Gobaneng Keyafa a se a kgona go Le bona? O be a le hlogo ya motho wa bodumedi ka nako yeo. Gobaneng a se a bona yoo e be e le Mesia? Gobaneng Judase a se a Le bona? Judase o be a na le thwi le bona, a sepela le bona, a dira mehlolo le bona. Eupša Lentšu le ile la swanela go phethagatšwa. Beibele e re ba tsošeditšwe godimo go tšea lefelo leo. Ba tsošeditšwe morero woo. Yeo ke therešo. Baroma 8 e bolela seo.

<sup>69</sup> Bjale badumedi ba kgona go bona Lentšu le dirwa nama ka go moloko wa bona, Modimo a bolela. Bjale, bona badumedi ba therešo, bona ba dikete tše šupa (goba a e be e le makgološupa?) ka matšatšing a Eliya. Dikete tše šupa e nepile. Ka matšatšing a Eliya, go be go le banna ba dikete tše šupa go tšwa go e ka ba dimilione tše pedi goba tše tharo, ba ba bonego gore Leo le be le rereša. Ebile e sego bolekgoro la batho, le gatee. Eupša ba bone Le be le rereša. Ba bone Modimo a bonagatšwa. Mohlologadi yola wa kgale Elisa a bego a rometšwe go yena, o ile go topa diphata tšela, go dira kuku, gomme go no lekanelo go direla yena le morwa kuku, gomme morago ba hwe. Eupša šetša Eliya, o rile, "Ntirelele e tee, pele. Ka gore, GO RIALO MORENA, seroto se ka se šitwe le sedibelwana se ka se ome go fihla letšatši le Morena Modimo a romelago pula godimo ga lefase." Ga go potšišo, o ile thwi go tloga go dira kuku le go mo fa yona. O rile, "Dira ya ka pele, gomme morago o ye o dire e tee ya gago le morwago." Ka gobane, o kwele monna yola, le go mo lebelela; o be a le peu ye e kgethetšwegopele.

<sup>70</sup> Ba bantši ba bona ba re, "Mokerenko wola wa go tšofala šole gape. Modimo o re rogakilwe ka baka la gagwe," elelwang, Eliya. O rile, "Ke wena yo a ferekanyago Israele."

<sup>71</sup> O rile, "Ke wena o ferekanyago Israele." Le bona yo Modimo...O be a hlatsela Lentšu la Mang? Lentšu la Gagwe Mong.

<sup>72</sup> Bjale Beibele e re ba tsošeditšwe godimo bakeng sa morero wo, eupša ge...mo—mo mosedumele. Eupša bjale ge modumedi wa therešo a ka kgoni go bona Lentšu la lebaka leo le dirilwe nama, Modimo a bolela ka dipounama tša motho gomme ka gona a dira tlwa se A rilego O be a tla se dira, seo se a e rum!

<sup>73</sup> Bjale šetšang ka moka ga yona. Le se šetše maswao. Ge le šetša maswao, le tla tlaetšwa ka nnete bjalo ka lefase. Baprofeta ba maaka ba tla tsoga le go laetša maswao le dimaka tše di tla forago bakgethiwa ge go be go kgonega. Šetšang Lentšu. Lebelelang baprista ba, baprofeta ba, moprofeta wa Mohebere o eme fale. Tsedekia ka dinaka tše pedi tše kgolo tše toni, le go re, "Ke nna moprofeta mmewa wa Modimo." Ke therešo. "Ke na le makgolotharo le masomesenyane senyane thwi mo le nna, gomme Moya wo Mokgethwa godimo ga rena, o a tiišetša le go bolela gore naga yela ke ya rena. A re yeng godimo le go e tšea. Gomme ka dinaka tše, Ahaba, o tla šušula lenaba go tloga mobung, ka gobane Modimo o re file mobu."

<sup>74</sup> Šetšang monna yola wa modumedi, monna wa go loka, Josafate, o rile, "A ga le na le yo mongwe gape?"

<sup>75</sup> "Yo mongwe gape? Go na le makgolo a mane ba a dumelelana!" O rile, "Ee, go na le yo mongwe gape tikologong mo, eupša ke mo hloile." O rile, "Ka mehla o re kgakgamolla bohole ntle le go re botša ka mo re lego bodiradibe ba bagolo, le se sengwe le se sengwe." O re, "Ke mo hloile! Yena, yena ke Mika, morwa wa Jimila."

<sup>76</sup> O rile, "Oo, se leseng kgoši go bolela bjalo. Eyang le mo tšee gomme re kwe se a se boletsego."

<sup>77</sup> Kafao ba mo tlišitše tlase kua. O rile, "Mpheng bošego bjo gomme ke tla bona se Morena a se bolelago ka yona."

<sup>78</sup> Ahaba o rile, "Ke a go laela, o se ke wa mpotša selo eupša therešo."

<sup>79</sup> Gomme monna a tla, a re, "Bjale, ge o nyaka go boa morago ka go kopanelo ye botse, bolela go swana le bona ka moka.

Mika o rile, "Ke tla bolela feela se Modimo a se bolelago." Le a bona?

<sup>80</sup> Moso wa go latela, ba tlide ntla. Dikgoši di apere diaparo tša bona, ba dula keiting, batsebalegi bohole. Moprofeta a eme fale. O rile, "Bjale, lehlanya, o reng ka yona?"

<sup>81</sup> O rile, "Eyang pele godimo." O rile, "Eupša ke bone Israele e šwalalane bjalo ka dinku di se na modiši."

<sup>82</sup> A mo pha-...o tšere seatla sa gagwe le go mo phasola mo molomong. Moprofeta o phasotše moprofeta mo molomong.

Bjale, bobedi baprofeta bale ba tloditšwego ba be ba eme fale, ba profetile, makgolonne kgahlanong le yo motee, seo se be se lebega go tia. Bjale, ka keletšo ya lešaba ka mehla ga go polokego. Go ya le gore ke kae ba . . . ba eletša ka eng, keletšo ya bona ke eng. Fao go be go se polokego go kgoši, gomme o tšere lešaba lela gore keletšo ya bona e be e nepagetše. Eupša ge nka be a nno ema le go phetla disekorolo le go lebelela se Eliya a bego a sa tšwa go se bolela.

<sup>83</sup> Ka gona, Mika a ka be a se a bolela e ka ba eng, a bego a sa e tsebe, ge mohlomongwe Modimo a mo lebaletše yona. Eupša sa pele, ka go ba moprofeta, o ile go Modimo go hwetša ntle se Modimo a se boletšego. Gomme o hweditše ntle se Modimo a se boletšego. O rile, “Ke bone Modimo a dutše godimo ga terone, gomme O rile . . . makoko wohle a Gagwe a Legodimong a kgobokana go Mo dikologa, o rile, ‘Ke mang Re ka mo hwetšago go ya fase le go dira Ahaba go tla ntle mo, gore gabotse Re kgone go phethagatša seprofeto se se dirilwego ka yena?’”

<sup>84</sup> Le a bona, seprofeto, Eliya o be a šetše a rile, “Dimpša di tla latswa madi a gago.”

<sup>85</sup> Gomme kafao o rile o “bone moywa bofora o eya godimo go tšwa ka fase, wa tla godimo, wa tla godimo pele ga Gagwe, wa re, ‘Ke tla ya tlase le go tsena ka baprofeteng’ ba gagwe, baprofeta ba Ahaba, le go ba dira ba profete maaka.’”

<sup>86</sup> Bjale, Modimo o tsebile gore bona banna ba be ba gogomogile le go tlala thutamodimo kudu mo ba bego ba gopola ba be ba na le se sengwe le se sengwe se nepagetše. Ga se ba ke ba ela hloko Lentšu la iri. Kafao Modimo o rile, “O tla atlega; eya tlase.” Gomme ge Mika a boletše seo, seo se ba dirile go profeta ka fase ga moywa wo mobe. Ba ka be ba hlohotše plaka ntles ga mogala, goba go tima seyalemoya, goba go dira e ka ba eng; ba kwele Leo le etla kgahlanong le bona, ba tsogile le go sepelela ntles. Eupša lebelelang se se diregilego. Bjale, Mika o ile a swanelo go hlahlolo pono ya gagwe le Lentšu le le ngwadilwego, kagona o tsebile.

<sup>87</sup> O rile, “Ge ke etla . . . Beang monna yola ka kgolegong, mo feng meetse a mahloko le borotho bja mahloko. Ge ke boa, ke tla šogana le yena.”

<sup>88</sup> O rile, “Ge o ka boa morago ga tee, Modimo ga se a tsoge a bolela le nna.” Seo ke ge a tseba pono ya gagwe e tlwa le Lentšu la iri yeo. E be e le nako ya Ahaba.

<sup>89</sup> Ngwanešu, kgaetšedi, ye ke iri le nako ya go bitša go tšwa Babilonia. Dietša tša mantšiboa di mo. Sepelang ka Seetšeng ge e sa le seetša. Elang hloko, badumedi ba bone Lentšu le bonagatšwa gomme ba a Le dumela. Jesu o rile, “Dinku tša Ka di kwa Lentšu la Ka, maswao a Ka a lebaka. Wa maaka di ka se mo latele.”

<sup>90</sup> Bjale a re yeng tabeng ya rena, ka gobane ke a bona ke ya go aroga. Ke nyaka go gatelela go mothalo wola wa thapelo kudu.

A re boeleng morago bjale go temana ye re e hlokometšego, mo motsotso. Gabotse, go tla direga gape go swana le ge go diregile ka mehla, bjalo ka mehleng.

<sup>91</sup> Modimo o rometše moprofeta wa Gagwe, Johane, bjalo ka ge Lentšu la Gagwe le boletše, o tshepišitše ka go Maleaki 3, “Bonang, Ke tla roma motseta wa Ka pele ga sefahlego sa Ka, go lokiša tsela.” Johane o hlatsetše selo sa go swana. Gomme re hwetša ntle gape, ka go Jesaya 40:3, gore Jesaya o rile, “Go tla ba le lentšu la moprofeta, yo a goelelago ka lešokeng, ‘Lokišang tsela ya Morena.’” Le a bona? Diprofeto tšeō tšohle! Gomme—gomme lebelelang, elang hloko ka pela, Lengwalo le mo tsebagaditše.

Ge ba rile, “O mang? A o Mesia?”

O rile, “Ga se nna.”

“A o Jeremia? Baprofeta, goba yo mongwe wa bona?”

<sup>92</sup> O rile, “Ga se nna. Eupša ke nna lentšu la yo a goelelago ka lešokeng, bjalo ka ge go boletše moprofeta Jesaya.”

<sup>93</sup> A o nagana ba be ba tla dumela seo? Aowa, mohlomphegi. Gobaneng? Ga se a tla ka kereke ya bona. O be a se wa bona... Le a bona, o ile ka lešokeng ka mengwaga ye senyane ka bogolo, gomme a tla ntle ka masometharo. Molaetša wa gagwe o be o le wo mogolo kudu go ka tla ka sekolo sa thutamodimo; o be a le yena wa go tsebiša me—me Mesia. Gomme yo mongwe le yo mongwe o be a tla be a mo gogela ka tsela *ye* le ka tsela *yela*. Gomme Modimo o mo rometše ka lešokeng, ka morago ga lehu la tatagwe, Sakaria. Gomme o be a le moprista, eupša ga se a tsoge a latela lefapa la tatagwe.

<sup>94</sup> Gobane, baprofeta ga ba tšwe go dilo tše bjalo ka tšeō. Ba tšwa go dinaga tša makgwakgwa, lešoka. Ga go motho a tsebago mo ba tšwago, goba ka mo ba tsogago tiragalong, goba e ka ba efe ya histori ya bona. Ba no tla thwi ntle gomme ba rera Lentšu, gomme Modimo o a ba tloša, gomme ba ya kgole; ba ahlola moloko woo, le go sepelela ka go Lentšu la Gagwe, ba letetše letšatši le legolo.

<sup>95</sup> Kereke ga se ya mo dumela, gobane o be a sa tsebje ke bona. Ba be ba se ne rekoto ya peo ye gagwe dipukung tša bona, kafao ka gona ba mo ganne. Le a bona, ga se ba dumela Lentšu la Modimo le le hlatsetšwego, pepeneneng, letere ka letere. Le a bona? Maleaki 3, Mangwalo a mabedi go mo hlatsela, Maleaki 3 le Jesaya 40:3. Le a bona, bobedi Mangwalo ao a bolela ka monna a etla, a lokišetša Morena tsela. O phethagaditše tlhaolo ye nngwe le ye nngwe ya tša lona.

<sup>96</sup> O be a le wa go ba moprofeta. “Ke tla roma go lena Elisa.” Gomme o be a le fao, ka tsela ye nngwe le ye nngwe ya makgwakgwa. Hlokamelang kafao tlhago ya gagwe e tsenelanago le Eliya. Eliya e be e le monna wa lešoka, Johane o

be a le bjalo; ka ntle. O be a se monna wa go thelela, o be a le monna wa makgwakgwa.

<sup>97</sup> Elang hloko gape, Eliya o be a hloile mosadi, o boditše Isebele ka pente yohle ya gagwe, le mo a bego a tla namela le go tloga. Johane o be a le bjalo. Isebele o lekile go bolaya Eliya, a ena ka medimo ya gagwe gore o be a tla kgaola hlogo ya gagwe go tloga go yena. Herodia o dirile bjalo. Le a bona?

<sup>98</sup> Ka mehla šetša molaetša wa bona, šetša se ba se dirilego. Bjale re hwetša ntle gore ge ba ka be ba lebeletše morago le go bona se Beibele e se boletšego, le go šetša tlhago ya monna le ka fao a bego a phethagetše ka nakong le Mangwalo le se sengwe le se sengwe, ba ka be ba tsebile gore o be a le yena. E ka ba seripa sa tasene ba o tsebile. Yeo ke nnete. Ga se ka godimo ga seripa sa tasene ba o lemogilego. Ba ile go mo kwa, eupša ga se ba Le dumela. Le a bona? Gobaneng? Ga se ba dumela boitsebišo bja seprofeto ka go iri ya bona.

<sup>99</sup> Elang hloko, ba mo segile, ba mmitša lengwe “la go goelela, la lebelete, lehlanya la go se rutege la go se tsene sekolo, ‘betha, ga go na, tote, rwala, tšea,’ le go ya pele.” Bjalo ka mehleng ba mo ahlola ka thuto ya gagwe. Ba mo ahlotše ka popopolelo ya gagwe, ka tsela ye a bego a apara. O be a na le seripa sa mokgophwa nku go mo raretša, le lepanta la mokgophwa wa kamela godimo, o be a na le meriri gohle. A sepelela ntle ka meetseng; a se ne kereke, a se ne sefala, a se ne tirišano; ga se ba kgone go amogela seo; ba be ba rapela modimo wa lefase. Le a bona?

<sup>100</sup> Ga ke bolele gore bjale ga go baprofeta ba maaka ba tlago ntle, go swana le Jamboro le Jannes. Eupša tsela ye o nyakago go dira, ke go hlahlifa molaetša wa setlogo ka Lentšu, gona o na le wona; o ka go lebaka lefe, gomme go profetilwe eng sa lebaka leo.

<sup>101</sup> Ka gona seprofeto sa Johane se hlatsetšwe ka go tshepedišo ya Modimo Mong. Šetšang go phethagetše bjang. Beibele e rile, “Lentšu la Morena le tla go mopropfeta.” Gomme Jesu o be a le Lentšu. Gomme Johane o be a profeta ka go tla ga Lentšu go phethagatšwa; gomme Jesu, Lentšu, le tlile go mopropfeta, ka meetseng. Oo, go botse bjang! Ga le šitwe bjang... Le a bona? Lentšu e be e le selo sa go hlokwa ka go letšatši leo. Mo go tla mopropfeta, o re, “Ke nna lentšu la Lentšu.”

Ba rile, “Re swanetše re dire eng?”

<sup>102</sup> O rile, “Ga ke ne maswanedi go tlemolla dieta tša Gagwe. Eupša go Yo a emego magareng ga lena, felotsoko, O tla ba Yena a tla le kolobetšago ka Moya wo Mokgethwa le Mollo. Leselo la Gagwe le ka seatleng sa Gagwe, gomme O tla hlwekiša seboa sa Gagwe ka go tsenelela, le go tšuma mooko ka mollo wa go se time, a iša leroro sešegong.” Oo, a mopropfeta! Jesu o rile ga se gwa ke gwa ba motho wa go tswalwa ke mosadi yo mogolo bjalo ka yena, go fihla letšatši leo. Oo, ye kgolo bjang! Ka fao a tsebilego mo a bego a eme! O tsebile tlwa. O kwele go tšwa go Modimo,

gomme e be e le tlwa le Lentšu, kafao o be a sa tshwenyege ka se batho ba bego ba se bolela. O Le rerile le go Le profeta, go le bjalo. Gomme šetšang, ge monna a emela se e lego Therešo, gona Modimo o a tlemega go hlatsela monna yo Therešo.

<sup>103</sup> Ge Moshe a theogela kua Egepeta, le go re, “Ke be ke le ka lešokeng mošola, gomme ke bone mohlare o tuka, gomme ga se wa swa. Ke ile godimo mohlareng, gomme, ge ke dirile, fao go be go le Pilara ya Mollo ye kgolo e lekeletše fao. Gomme Lentšu le rile, ‘KE NNA MOBAGONA.’ Gomme O mpoditše go tšea lepara le le go tla tlase mo le go dira mehlolo ye, gomme Modimo o tla hlatsela Lentšu la Gagwe.” O otlolotše ntle lepara la gagwe, fao gwa tla matsetse le dintšhi, le leswiswi le go ya pele. Gomme ka gona go hlatsela moprofeta yola, O tlišitše badumedi bale thwi morago thabeng, gomme Modimo o tlide fase ka go Pilara ya Mollo ya go swana, thwi godimo ga thaba ya go swana le go netefatša gore e be e nepagetše.

Bjale lebelelang se A se dirilego ka go letšatši le. Tlwa.

<sup>104</sup> Bjale, Lentšu le tlide go moprofeta le go mo hlatsela go ba motho wa therešo, yena motho yo Mangwalo a boletšego gore o be a tla ba. Ka pela bjale. Eupša, gape, Jesu o tlide ka sebopego sa go fapano go tšwa go tlhathollo ya bona ya seprofeto ya madirwa ke motho. Motho o ile a swanelwa ke go hlatholla se se bego se tla ba. Nnene. Mapresbyterian ba nagana gore e swanetše go ba bona. Šetšang ge Modimo a dira e ka ba eng, šetšang mokgatlo wo mongwe le wo mongwe gape o tsoga le se setee. Ya, ka mehla go bile ka tsela yeo. Ba bile le Jamboro le Jannes kae kapa kae. Elang hloko, ba boletše karolo ya Lentšu. Eupša, go ya ka Lentšu la moprofeta, Letere le lengwe le le lengwe!

<sup>105</sup> Ba e fošitše gape, bjalo ka mehleng, ba Mmiditše mmolellamahlatse, “diabolo; Beletsebubu,” le gore O itirile Modimo Yenamong, ge ba swanetše go be ba be ba tsebile, ka yona Beibele ya bona, gore O be a le Modimo.

Elang hloko, O profetilwe ke Jesaya, Jesaya 9:6, e rile, “Leina la Gagwe le tla bitšwa Modimo yo Maatla, Tate wa Gosafelego.” Ga go sa ile go ba botate ba bangwe ka morago ga yoo, ka gobane O be a le Tate wa pele mathomong, Yena ke Tate a nnoši; o rile, “Le se ke la bitša monna e ka ba mang lefaseng le, ‘Tate,’ ebile, morago ga yoo.” “Yena ke-Modimo yo Maatla, le Tate wa Gosafelego, Moeletši, Mokgoma wa Khutšo.” Nnene.

<sup>106</sup> Bjale, ba Mo dirile tšohle tše baprofeta ba di boletšego gore ba tla di dira, feela bjalo ka ge ba dira ka go Lebaka le la Laodikia, ba Mmeile ka ntle ga kereke. “Difofu, ba ponoka, gomme ga ba e tsebe.” Feel a se moprofeta a se boletšego, moprofeta wa Beibele. Ba foufaditše ke ditšo tša motho, ba Mmeile ka ntle, Lentšu ka ntle ga dikereke tša bona, bjalo ka mehleng, bjalo ka ge go profitilwe ka bona.

<sup>107</sup> Elang hloko bjale, ka pela bjale. Le se ke la hlaiwa ke se bjale. Temana še, kafao Jesu a dirilego Yenamong go tsebja go barutiwa ba babedi ba A bego a le Mesia wa bona! Bjale, mahlo ohle ka tsela ye. Gomme ntle ka nageng, le se hlaiwe ke se bjale. Re lekile go le botša gore Beibele ke Lentšu la Modimo, e ngwadilwe ke Modimo Yenamong, ka dipounama le ka sedirišwa sa motho. Modimo o kgona go ngwala, Yenamong. Modimo o kgona go bolela, Yenamong. Modimo o kgona go dira se A se nyakago, eupša O kgethile motho go se dira ka gore motho yo a E ngwadilego ke karolo ya Modimo. Kafao, Modimo o ngwadile Beibele. Banna ebile ba be ba sa tsebe se ba bego ba se ngwala, ka go naganeng ga bona ga semotho. Ba ka no se dumelane le Yona, eupša ba E ngwadile. Ba be ba ka se kgone. Beibele e rile, “Banna ba kgale, bjalo ka ge ba be ba sepedišwa ke Moya wo Mokgethwa!” Modimo o sepedištše diatla tša bona, sepedištše mahlo a bona ka diponong. Ba be ba sa kgone go bolela selo eupša se ba bego ba se lebeletše. Ba be ba sa kgone go bolela selo, gobane O be a na le taolo ya go tlala ya leleme, monwana, setho se sengwe le se sengwe sa mmele se be se sepela ka bottlalo le Modimo. Ga go makatše Beibele e rile ba be ba le badimo, ba be ba le karolo ya Modimo! O be a le bottlalo bja Modimo.

<sup>108</sup> Elang hloko ka fao Jesu, Lentšu, a dirilego barutiwa ba babedi ba ba bego ba robegile dipelo go tseba O be a le Mesia wa bona, Mesia, Lentšu le le tshepišitšwego. Elang hloko se A se dirilego, O dirile aphile go seprofeto. Elang hloko, “Mašilo, go nokologa go dumela tšohle tše baprofeta ba di ngwadilego.” Bjale, Yena ga se a ka a re, “Gabotse, eng, kereke e reng ka yona?”

<sup>109</sup> Ba Mo fa kanegelo. Ba tsebile ditiragalo tšohle di diregile. Ba be ba nyamile bohle. Ba thoma go Mmotša, “A O no ba mosetsebje mo, goba a Ga o tsebe tše di diregilego ka Jerusalema?”

<sup>110</sup> O rile, “Ke dilo dife?” mo o ka rego O be a sa tsebe. Le a bona, O dira dilo nako ye nngwe go no bona se o tla se dirago ka yona. Le a bona? O rile, “Ke dilo dife? E be e le mang? Go diregile eng?”

<sup>111</sup> “A O no ba mosetsebje?” Gomme ba be ba bolela thwi go Monna yo ba phetšego le yena lebaka la mengwaga ye meraro le seripa, gomme ba be ba sa Mo tsebe.

“Ke dilo mang? Go diregile eng?”

<sup>112</sup> “Gabotse,” ba rile, “Jesu wa Nasaretha, e bego e le Moprefeta. Ga go pelaelo ka monaganong wa rena. O be a le maatla ka Lentšu le ka tiro pele ga batho bohle. Re Mmone a dira dilo tše A tsebagaditšwego go ba Moprefeta wa Modimo wa lebaka le. Re tseba seo. Gomme re dumetše gore O be a tla ba Molopolodi, gore O be a tla lopolla Israele.”

<sup>113</sup> Nako yeo O a retologa gomme a re, “Lena mašilo, dipelo tša go tšwafa go dumela tšohle tše baprofeta ba di boletšego ka Yena

gore di tla tla go phethega?" Le a bona? Mo šetšeng bjale a eya morago go seprofeto. A tsholo go badumedi, ba bego ba tteleima gore ba be ba Mo dumela!

<sup>114</sup> Elang hloko ka fao A batametšego thuto. Yena ga se a tla thwi ntle le go re, "Ke nna Mesia wa lena." A ka be a kgonne go e dira, ka gore O be a le. Eupša elang hloko O itsebagaditše Yenamong ka go Lentšu, ka gona ba be ba tla tseba. Ge A ka be a e boletše, O be a ka be a boletše seo gomme go be go ka se be bjalo; eupša ge A ile gomme a thoma go bolela ka tšohle baprofeta ba di boletšego ka Yena, gomme ba e bone, gona ba be ba tla ipotša bonabeng, ge ba be ba le bana ba Modimo. Eupša o bileditše šedi ya bona go se baprofeta ba se boleletšegopele le go se lebelela ka nako ye Mesia, lebaka la Gagwe, le tla bonagatšwa. Yena, bjalo ka Johane, o dumelitše Lentšu, Beibele, go tsebagatša Molaetša wa bona. Moprefeta ofe kapa ofe wa therešo o tla e dira. Ya. Ga se a tla ntle le go re, "Ke nna Yena. Ke nna . . ." Yoo ga se moprefeta wa therešo wa Modimo. Le a bona? Eupša O rile, "Eyang morago ka Mangwalong." Le a bona, Yena ga se a tsoge a šitiša tsela ya Gagwe ya go e dira. Le a bona?

O rile, "Re tseba Moshe."

<sup>115</sup> O rile, "Ge le ka be le tsebile Moshe, nkabe le Ntseba." O rile, "Moshe o ngwadile ka Nna." O rile, "Puruputšang Lengwalo, ka go Wona le nagana le na le Bophelo bjo Bosafelego, gomme Lengwalo ke le le pakago ka Nna. Eyang gomme le lebelele ka Lengwalong gomme le e bone."

<sup>116</sup> Mo ga se A tsoge a fetola tsela ya Gagwe ya go e dira, ga se a tsoge a fetola. A ka se tsoge a kgonne go fetola, ka gobane Ke Modimo wa go se fetoge. Le a bona? Elang hloko O ile thwi morago go barutiwa ba babedi ba, Kleopa le mogwera wa gagwe, tseleng go ya Emause, le go re, aphila go Mangwalo go bona, a re, "Le reng le le mašilo le sa dumele lona Lentšu lela baprofeta ba le ngwadilego mabapi le Mesia le swanetše go phethagatšwa?" Oo, a letšatši!

<sup>117</sup> Johane o dirile selo sa go swana. "Puruputšang Mangwalo, lebelelang morago, a rile go tla ba 'lentšu la yo a goelelang ka lešokeng.' Ke tšwa kae?" Le a bona? Leo, leo le be le tla e bea molaleng go bona. Nnene!

<sup>118</sup> E tla e bea molaleng lehono, selo se re bonago Moya wo Mokgethwa o se dira. O ile a re, "Puruputšang Mangwalo." Gomme re . . . O re nyaka re e dira lehono.

<sup>119</sup> Elang hloko, O thoma ka seprofeto sa Moshe, Beibele e rile, "O, thomile ka Moshe le baprofeta bohole," eupša O thomile ka Moshe. "Moprefeta," Moshe o rile, "Morena Modimo wa lena o tla tsošetša godimo magareng ga lena batho, magareng ga batho. Morena Modimo o tla tsošetša Moprefeta godimo."

<sup>120</sup> Bjale A ka no ba a rile, "Kleopa, le mogwerago mo, a Moshe ga se a ke a bolela gore ka matšatšing a Morena

Modimo o tla tsošetša Moprefeta godimo? Gomme Monna yo ba mmapotšego, a O kgotsofaditše senyakwa seo? Bjale, Moshe o profitile se. Bjale ga se le be le moprofeta lebaka la makgolo le makgolo a mengwaga, gomme mo Monna yo o tsogile. Gomme pulamadibogo ya Monna yo e be e le mang, o boletše eng?" Le a e hwetša? Gomme baprofeta bohole ba boletše ka Yena, ka lebaka la Gagwe, O boletše le bona. Ka nnete ba ka be ba bile le kgahlego go Mo theetša. A o be o ka se rate go Mo kwa? Ke be nka rata go Mo kwa, go Mo kwa, se A se boletšego gore baprofeta ba se boletše ka Yenamong, eupša Yena ga se ke a re e be e le Yena. O nno ba laetša ka seprofeto. O nno re, "Moprefeta o rile se se be se tla direga." Le a bona?

<sup>121</sup> A re nong go ya morago metsots e se mekae, gomme bjale a re theetšeng Mantšu a a tsopotšwego go tšwa go Yenamong. Šetšang mo, Lentšu Lonamong le tsopola Lentšu la Yenamong. Lentšu Lonamong le tsopola Lentšu la Yenamong. E sego go ba botša gore O be a le leo, eupša go no dumelela Lentšu go bolela Lonamong, ka gona ba a tseba O be a le Mang. Letere ya Lentšu, e tsopola Lentšu ka go... Lentšu ka nameng, le tsopola Lentšu la letere, le tsebagatšwa ka bottlalo le Yenamong. Lebelelang mo, bjale a re Mo theetšeng a tsopola. Kafao... Bjale, re a tseba gore ba nnyetletšwe bohole ka ditiragalo tša morago, ke gore, tša papolo le kanegelo ya tsogo, lebitla, bjalo ka ge re sa tšwa go bala. Bjale O ya thwi go Lentšu le seprofeto ka Yenamong. Bjale a re nong go nagana gore O boletše se; O boletše bontši kudu go feta se, eupša setšang.

<sup>122</sup> A re reng Yena... Mo kweng a re, "Phutholla ka go Sakaria 11:12. A Mesia o be a se a swanelo go rekišwa, go ya ka moprofeta, ka diripana tše masometharo tša silihore? O sa tšwa go bolela gore Monna yo o rekiitšwe ka diripana tše masometharo tša silihore. Phutholla ka kua..." A le a a hwetša Mangwalo? Sakaria 11:12. Gomme ka gona O rile, "A le etše hloko se Dafida a se boletšego ka go Dipesalome, Pesaleme 41:9? O be a yo ekwa ke bagwera ba Gagwe. Gomme ka gona gape, ka go Sakaria 13:7, O tlogetšwe ke barutiwa ba Gagwe. Gomme ka Dipesalome 35:11, o pharilwe molato ke dihlatsi tša maaka. Le no re O be a le. Jesaya 53:7, O be a le semuma pele ga babegi ba Gagwe. Jesaya 50:6, ba Mo šorofaditše, moprofeta o boletše. Pesaleme 22, O be a le wa go lla sefapanong, 'Modimo wa Ka, Modimo wa Ka, gobaneng O Ntlogetše?' A O dirile seo, letšatši pele ga maabane morago ga sekgalela? Pesaleme 22 gape, 18, diaparo tša Gagwe di ile tša aroganywa magareng ga bona. A ba dirile seo? Gomme Pesaleme 22:7 go ya go 8, o kwadilwe ke manaba a Gagwe, kereke. Pesaleme 22 gape, go be go se lerapo ka mmeleng wa Gagwe la go ka robja, eupša 'ba tsetsemeditše diatla tša Ka le maoto a Ka,'" O boletše. A swere diatla tša Gagwe ka morago ga Gagwe, ntle le pelaelo, ka nako yeo. "Jesaya 53:12 e rile O tla hwa gare ga basenyi. Jesaya 53:9 e rile O bolokilwe le bahumi.

Pesaleme 16:10 e rile, ‘Nka se tlogele soulo ya Gagwe ka heleng, ebile Nka se tlogele Mokgethwa wa Ka yo Motee a bona go bola.’ Gomme a e be e se Maleaki 3 pulamadibogo ya Monna yo?’ Oo, ke be nka rata go Mo kwa a tsopola yeo. Lebelelang diprofeto! Elang hloko, gona dikai tšohle A ka bego a ile go di kgabola, ka Isaka, ka go Genesi 22, kafao Modimo a apešitšego Isaka morithi, kafao tate Abraham a tšerego morwa wa gagwe mong, a rwala legong go phara thaba, le go neela godimo morwa wa gagwe mong.

<sup>123</sup> E be bjale e thoma go nwelela ka go bona. O be a ba boditše ba be ba le mašilo ka go se lebelele go seprofeto sa letšatši leo. Gomme bjale e thoma go nwelela ka gare, ba thoma go bona go phethagala ga sohle se se diregilego ka matšatšing a se makae a go feta, ka go mengwaga ye mebedi goba ye meraro ya go feta, seprofeto sa go hlatselwa sa lebaka. Ebile nako yeo mo ba tsebilego Mogwera wa bona yo a bapotšwego, Jesu, o phethagaditše Lentšu le lengwe le lengwe la se. Oo, e bile nako yeo mo ba tsebilego gore Monna yoo ka therešo e be e le Mesia yoo, gore—gore O be a swanetše go tsoga go tšwa bahung. ‘Lebitla ga se la kgona go Mo swara. ‘Nka se tlogele Mokgethwa wa Ka yo Motee a bona go bola.’ Ga go Lentšu le tee la seprofeto le ka tsogego la šitwa. Gomme O tsogile.”

<sup>124</sup> “Ka gona batseta bale tlase lebitleng mosong wo ba be ba nepile. O tsogile go tšwa bahung. O a phela. Yena ke Mesia yola.” Gobaneng? Se e šitiše. “Tiro ya Gagwe, bodiredi bja Gagwe le se sengwe le se sengwe A se dirilego se hlatseditše tlwa Mantšu ao moprofeta a rilego se tla direga go letšatši le. Seo se e dirile.” Nako yeo ba tsebile gore e be e le Yena, Mogwera wa bona yo a bego a bapotšwe, Jesu, yo a e dirilego. Ga go makatše dipelo tša bona di be di e swa ka gare ga bona ge A be a bolela le bona. Bjale ba sepetše dimaele tše tshela, gomme go bonagetše bjalo ka nako ya seripana.

<sup>125</sup> Gomme selo se sengwe sese se ba se dirilego, le a tseba, ba kwele theroy a diiri tše tshela ka seprofeto e hlatselwa. Seo ke se a bego A bolela le bona mmogo tseleng. Feela ka pela ge ba thomile go theoga tsela, O tšwetše ntle, ka gobane o be a le thwi kua Jerusalema. Diiri tše tshela thari-le...moragorago, meborogo ye masometshela, ba be ba le thwi go theoga tsela dimaele tše tshela go ya Emause. Yeo ke ye e lego yona. Gomme O rerile, go tiišetša seprofeto diiri tše tshela. Le se nkahlolle ka tša ka tše tharo, gona, le a bona. Le a bona? Eupša elang hloko, ba rerile...O...Ba kwele theroy a diiri tše tshela ka seprofeto se tiišetšwa, se hlatselwa.

<sup>126</sup> Bjale go be go eba go leba nako ya mantšiboa. Le a tseba, O a swana maabane, lehono, le go ya go ile. E bile nako yeo mo A butšego mahlo a bona go tseba gore Bahebere 13:8, O a swana maabane, lehono, le go ya go ile. Ka nako ya mantšiboa, ditiragalodi hlakišwa ke seprofeto. Se se diregago ka go iri ya

sebjalebjale se ka kgona go tsebja gabonolo ge o ka no dumela seprofeto sa iri.

<sup>127</sup> “Ee, mašilo, go nokologa go kwešiša, go nokologa go dumela (o tšwelapele o nagana ka yona), go dumela gore tšohle baprofeta ba di boletšego ka Mesia, a ga sa swanela go direga?” Bjale O hlahlofile dintlha tše tšohle tše morago le go laetša se baprofeta ba rilego se tla direga. Gona ba thoma go kwešiša. Kafao O rile... dirile se o ka rego O a feta. Ba ratile Monna yo. Ba rile, “Wena, O re file se sengwe. Ga se ra ke ra gopola seo. O a phela felotsoko.” Ba be ba bolela le Yena, ga se ba e tsebe. Kafao Yena... gomme ntle le pelaelo O ba lebeletše ka go nyama, gomme A thoma go sepela go feta, eupša O—O be a letetše bona go Mo laletša. Seo ke se A se letetšego bošegong bjo, wena go Mo laletša.

<sup>128</sup> Elang hloko, ge barutiwa bale ba Mo laleditše ka gare go kopanelo ya bona go dikologa taftola, e bile nako yeo mo A dirilego se sengwe go no swana le ge A dirile pele ga papolo ya Gagwe, gomme mahlo a bona a bulega. Ba tsebile mokgwa wa Gagwe, setaele sa Gagwe. Ba tsebile se A se dirilego, gomme O se dirile nako yeo go no swana le ge A dirile pele. Gomme ba rile, “Yo ke Yena!” Gomme ka pela ba phagametše godimo go e goeletša ntle, gomme A nyamalala. Gomme moo ba tšerego diiri tše tshela go theetsa theroye, mohlomongwe metsotso ye masomepedi ba be ba le dikgato bofeso go boela morago go botša ka moka ga bona, “O tsogile ka nnete. Ka kgontha O a phela.”

<sup>129</sup> Bagwera, ye ke phethagalo ya Maleaki 4, Mokgethwa Luka 17, Mokgethwa Johane 15, oo, bontši kudu, Kutollo 10, diprofeto tše ntši tše di ka thabelwago tlwa go letšatši le. Gomme gape ka go Puku ya Mareka le ka go Mateo, moo A rilego maswao a magolo a le dimaka a tla bonala ka lefaufaung, gomme batho ba a biša dipiring, dipiring tša go fofo, di kgona—kgona go nyamalala ka maatla le lebelo la mogopololo, bohlale bjo bo ka sepelelagoo ka gare. O kgona go ngwala, O kgona go bolela, A ka kgona go dira e ka ba eng A nyakago. Pilara ye kgolo ya Mollo, “go swana maabane, lehono, le go ya go ile.” Gomme diponagalo di tla godimo ga lefase, diphiramiti tša muši di rotogela ka moyeng, godimodimo moo go ka se kgonego go ba bošidi le ge e ka ba eng, dimaele tše masometharo godimo. E akanyeditšwepele ngwaga le seripa pele e direga, gore e be e tla ba ka tsela yeo. Gona retolla seswantšho gomme o bone ke Mang a lebeletšego fase. Ga go Lentšu le tee le kilego la šitwa le le boletšwego, gomme šeles Lentšu la Modimo le le ngwadilwego, le a tiišetša ke Therešo. Gomme ke nako ya mantšiboa gape. Ke a makala ge A ka bowa, ka mogau, bošegong bjo gomme a dira se sengwe bjale go swana le ge A dirile morago kua. A re rape leng le go Mo kgopela. Ditiragalo di hlakišwa ke seprofeto se se hlatsetšwego.

<sup>130</sup> Ramaatlakamoka Modimo, re thuše. Re thuše, morategi Modimo, go kwešiša, go kwešiša dilo tše re swanetšego go

di tseba, go kwešiša Lentšu la Gago. Gomme bjale, Morena, re kwele dithero bjale e ka ba kgaušwi le dikete tše pedi tša mengwaga, dingwalwa tša dipuku. Gomme ka matšatšing a a mafelelo še e ngwegetše thwi morago gape, gomme bjale ke go leba nako ya mantšiboa. Mamethodist, Mabaptist, Mapresbyterian, le ba bantsi ba bona go theoga go kgabola lebaka ba boletše le Wena, gomme mohlomongwe feela go bapela le tsela ya letšatši le legolo le e sego ya ke ya ba bošego goba mosegaré, bjalo ka ge mopropeta a boletše, eupša go tla ba Seetša nakong ya mantšiboa. Jesu o tsogile lebitleng gomme a bonagala go Simone le go basadi, le go ba laetša gore O be a phela. E be e le moso. Gomme ka gona mantšiboa O tla morago gape. Eupša O sepeletše go bona go kgabola mosegaré, a ba sola bakeng sa bofofu bja bona, eupša nakong yeo O itirile Yenamong go tsebjia go bona nakong ya mantšiboa.

<sup>131</sup> Modimo, etla ka kopanong ya rena bošegong bjo yeo re nago nayo go dikologa Lentšu. Modimo, go dumelwa ka boſesane kudu lehono magareng ga batho, eupša ke a leboga gore go na le ba bangwe ba O ba biditšego le go ba beela Bophelo bjo Bosafelego, gomme O rile, “Bohole ba Tate a Mphilego bona ba tla tla.” Gomme ge Dietša tša mantšiboa di sa phadima, ge O sa dumelatše, Morena, gore ga go seprofeto se tee (go tše makgolo tše di ilego pele) se kilego sa šitwa nako e tee. Ka gona therešo ge se tsebagatša, e swanetše go ba Wena, ka gobane ga go motho a ka kgonago go korola bjalo. Go no swana le Beibele, ga go motho a ka kgonago go ngwala, ga go motho ka go seksgala sa mengwaga ye makgolo a lesometshela, ka bangwadi ba masomenne ba go fapania, ba kgonne go ngwala, gomme ga go phošo e tee e lego ka go Yona.

Morategi Modimo, ke a rapela gore O tla bonagatša Wenamong bošegong bjo, ya Bahebere 13:8, gore O a swana maabane, lehono, le go ya go ile. Gomme mediro ye O e dirilego nako yeo, O a e dira lehono. Gomme O e tshepišitše, O rile, “Ka matšatšing a a mafelelo, ge lefase le dutše bjalo ka Sodoma le Gomora, phapogo.” Re lebeletše bašemane ba feela go swana kudu le basetsana, ba apara diaparo go swana le bona, le—le go bona basetsana ba leka go dira bjalo ka bašemane, le go bona basadi le banna ka go lebaka le la go fapošwa, go bona taletšo ya thobalano e ba mo—mo modingwana wa go rapelwa. Ebangedi e kgoromeleditše ntle lehlakoreng le tee, le mapona ka go kereke ya Laodikia. O Modimo, a iri! Etla, Morena Jesu, dira Wenamong go tsebjia go rena. Ka gobane re e kgopela ka go la Jesu Leina.

<sup>132</sup> Bjale ge le sa na le dihlogo tša lena di inamišitšwe, mahlo a lena a tswaletšwe, ke ya go le botšiša se sengwe. A le a dumela gore Modimo o mo? A le a dumela gore dilo tše E di dirago lehono ke seprofeto se a phethagatšwa? A le a dumela gore Jesu Kriste o a swana maabane, lehono, le go ya go ile? A le a dumela ge A be a le mo le go bonagatšwa ka nameng go letšatši lela, le mediro

ye A e dirilego kua, e be e swanetše go bušeletšwa gape ka go letšatši le? Moprefeta o boletše bjalo. Beibele e boletše bjalo. Lengwalo lohle le swanetše go phethagatšwa, le ka se tsoge la šitwa. O itsebišitše bjang Yenamong? Ka go ba Moprefeta yola yo Moshe a boletšego ka yena. O tsebile diphiri tša dipelo tša batho. Mosadi o kgwathile seaparo sa Gagwe, O retologile le go re, “Tumelo ya gago e go phološitše.” Ge Simone Petro a etla godimo go Yena, O tsebile leina la gagwe, o mmoditše yo a bego a le yena, tatagwe o be a le mang. Gomme Jesu yoo wa go swana wa go ratega ga se a hwa, O a phela go ya go ile. Tumišo a e be go Modimo! Gomme ke a dumela, ka go nako ye ya mantšiboa bjale, O re biditše mmogo gape.

<sup>133</sup> O Morena Jesu, etla magareng ga rena. Se re fete. Etla, dula bošego bjohle le rena go fihla bošego bjo bo fedile, ka gona a nke re ye le Wena gosasa; re ka Go tseba ka go maatla a tsogo ya Gago, gore lerato la Gago le mogau le kgaogelo di be le rena. O Modimo wa Gosafelego, e fa dilo tše. Re a tseba gore Modimo a nnoši a ka kgona go di fa.

<sup>134</sup> Ka go go ikgetha ga iri ye, a re boleleng se. Modimo, Tate wa rena, nama ya rena ke tabarenenekele ya go šokiša ya Gago. Eupša, Morena, a nke mogau wa Gago wa go hlwekiša, Moya wo Mokgethwa wa Gago, o tle bjale. Re hlwekiše go tšwa go pelaelo ye nngwe le ye nngwe le kgakanegokgolo ye nngwe le ye nngwe, kgonono ye nngwe le ye nngwe le mothalo wo mongwe le wo mongwe wa pelaelo wo o ka bago ka go rena, gore re lokologe ntle le pelaelo; re tšwele ntle, re ipolela ka sebete bjalo ka Petro, “Wena O Kriste, wa go swana maabane, lehono, le go ya go ile.”

<sup>135</sup> Re a dumela gore Lentšu la Gago ke Therešo, Morena. A nke re no bona, pele re thoma mothalo wo wa thapelo, Morena, dira Wenamong go tsebja go rena. Bjalo ka ge O rile, “Bjalo ka ge go bile ka matšatšing a Loto,” ge Abraham, sehlopha sela sa go biletšwa ntle a letile morwa wa tshepišo, Loto ke ge a le tlase kua a ekwa Billy Graham wa sebjalebjale le Oral Roberts go peakanyo yela ya kereke ya leina tlase kua, bjalo ka setšhaba. Eupša Abraham e be e le modiiledi ntle le mokgatlo wo o itšego, feela le sehlopha se sennyane se ba tsekella gohle go kgabola naga ye a bego a tlie go ba mojabohwa. “Gomme ba boleta ba tla tsea lefase bjalo ka kabelo.” Letsatši le lengwe, ka tlase ga mohlare wa morithi, ge ba be ba dutše, ba khutšitše, Modimo o tlie fase ka sebopego sa Monna. Barongwa ba babedi ba ile tlase Sodoma. Gomme Modimo, ka go nama ya motho, o netefaditše gore O be a le, O rile, “Abraham, mosadi wa gago o kae, Sarah?” Matšatši a se makae pele ga fao, o be a le Abram; le S-a-r-r-a, Sarra, e sego Sarah, “mohumagatšana.” Gomme O mmiditše ka leina la gagwe la mohumagatšana, morwedi wa kgoši. O biditše Abraham ka leina la gagwe, Abraham, tatago ditšhaba. Gomme O rile, “Ke ya go go etela.”

<sup>136</sup> Modimo, kafao pelo ya moprofeta yola e swanetšego go be e ile ya taboga! O tsebile O be a le Mang thwi nako yeo. Ga go makatše o ile a hlapiša maoto a Gago, a tliša ntle dijō tšohle a bilego natšo, gomme tšona tše kaonekaone, a di bea pele ga Gago. O tsebile e be e le Modimo fao. Nako yeo O rile, “Sarah o kae?” mo o ka rego O be a sa tsebe. Gomme O . . .

<sup>137</sup> Abraham o rile go Yena, “O ka tenteng . . . o ka tenteng, ka morago ga Gago.”

<sup>138</sup> Gomme O boletše se se bego se eya go direga. Gomme yena, ka pelong ya gagwe, o Le belaetše. Gomme nako yeo O—O rile go Abraham, “Gobaneng Sarah a belaetše seo, a re ka pelong ya gagwe ‘Dilo tše di ka se be?’ A e ka ba go na le e ka ba eng ye thata kudu go Modimo?”

<sup>139</sup> O Modimo! Jesu, Modimo yo a bonagaditšwego wa Lentšu, O rile, “Bjalo ka ge go bile ka matšatšing a Sodoma,” lefase le tla ba ka leemong leo feela pele ga tshenyo ya lefase la Bantle, lebaka la Bantle. Ke rena ba, Masodoma go fihla kgwekgweng! Gomme ka gona O boletše gore Morwa wa motho, yo ka mehla a bitšwago “moprofeta,” o tla utollwa ka go iri yeo. Phethagatša Mantšu a Gago, O Modimo. Rena, bana ba Gago ba ba dumelago, re letile ka dipelo tše di hlokofetšego, go re fa tumelo, Morena, gore, ge re na le mothalo wa thapelo, batho ba tla dumela. Ke nako ya mantšiboa, Tate. A nke Dietša tša mantšiboa tša Morwa wa Modimo (Yo a bego a le Gona, gomme A lego Gona, gomme A Tlago go Tla) a iponagatša Yenamong ka seprofeto se A se dirilego. Leineng la Jesu Kriste. Amene.

<sup>140</sup> Bjale ke loketše go—go rapelela balwetši. Eupša ke selo sa go se tlwaelege, kafao re emego fa. Ke eme mo bjale ke dira tlhohlo go phatlalatša, le kgokagano go kgabaganya setšhaba, gore Modimo e sa le Modimo. A ka se kgone go šitwa. Gomme se A se tshepišago, O tla se dira. A ka se tsoge a šitwa go se dira, ka gobane O tshepišitše go se dira. Kagona nka kgona go bea tshepo ya go ikgetha ka go se A se boletšego. Kagona ke lebeletše go Tla ga Gagwe, ke lebeletše Yena go bonagala nako efe kapa efe, ka gobane O rile, “Ka iring ye le sa naganego,” lefase ga le nagane, “nako yeo O tla bonagala.”

<sup>141</sup> Bjale, bokgole bjo ke tsebago . . . ke ka tabarenekeleng ya ka mo, gomme go na le batho ba se bakae ba dutše mo ba ke—ke ba tsebago. Ngwanešu Wright, ba ba sega ba bakae ba ba dutšego mo, bale thwi go bapela mo, ke a ba tseba. Eupša go na le ba bantsi ba lena ga ke ba tsebe. Gomme ga ke na le tsela ya go re Modimo o tla dira se bošegong bjo. Re Mmone a se dira lebaka la mengwaga le mengwaga ya go feta, eupša A ka no se se dire bošegong bjo. Ga ke tsebe. Go tšwa go Yena. O ikeme. O dira se A se ratago. Ga go yo a ka go Mmotša gore a dire eng. O dula a nnoši, ka go thato ya Gagwe le ditsela tša Gagwe. Eupša ka gobane O e tshepišitše, ke Mo kgopela go e dira. E

sego ka baka la rena, gore re a e hloka, eupša mohlomongwe bakeng sa basetsebje, gore Moya wo Mokgethwa o ka no ba o tloditšwe...bjale tlotšo godimo ga rena. Bjale, ga go kgathale O ntlotša gakaakang, O swanetše go le tlotša, le lena, nnete, go dumela.

<sup>142</sup> Bjale ke nyaka go ba le mothalo wa thapelo, gomme ke nyaka go rapelela balwetši kudu ka mo nka kgonago. Bjale, re ka kgona e ka ba go ba le mothalo, go bitša batho le go ba tliša godimo mo, mothalo wa thapelo le go rapelela yo mongwe le yo mongwe mo yo a babjago, ke a nagana, go ba le badiredi banešu go tla mo le rena, le go bea diatla godimo ga lena. Ka nnete re ka kgona go dira seo. Goba e ka ba go kgopela Tate wa rena, Yo a lego Yena a nnoši a ka kgonago go le direla e ka ba eng, ka gobane diatla tša ka e no ba monna go swana le lena banna. Eupša selo sa ntshe ke, ga se seatla sa motho se se e dirago; ke Lentšu la Modimo. Tumelo ka go Lentšu leo ke yona e dirago. Ga go selo sa sesaense ka yona, ke go se be sesaense ka go felela.

<sup>143</sup> Ga go selo se tee Mokriste a nago naso ka go sehlabani sa gagwe e lego sa sesaense. A le be le tseba seo? Lerato, thabo, khutšo, bopelotelele, go loka, boleta, bonolo, kgotlelelo, tumelo, Moya wo Mokgethwa, se sengwe le se sengwe ga se bonwe ke saense. Gomme seo ke selo se nnoši e lego sa kgonthe sa go ya go ile. Se sengwe le se sengwe o se lebelelago se tšwa lefaseng se boela morago lefaseng. Eupša dilo tše o sa kgonego go di bona ka leihlo la gago, eupša o Se bona se ipega Sonamong, leo ke lefase la Gosafelego.

<sup>144</sup> A le tla dumela, ge Modimo a ka iponagatša Yenamong le go laetša gore O mo o a phela, o dira dilo tša go swana tše A di dirilego mathomong, ka morago ga Molaetša wo, a o tla o amogela bjalo ka phodišo ya gago? A nke Modimo a e fe. Bjale ke kgopela e ka ba mang ka ntlong ye, ga go kgathale o mang goba o tšwa kae, ke go kgopela go no dumela ka go ikgetha Molaetša wo go ba Therešo. Wo ke Molaetša wo Modimo a nago le wona ka Beibeleng ya Gagwe wa iri ye, gore Jesu Kriste o mo bosegong bjo gomme o a phela. Bjale kgauswi...

<sup>145</sup> Lena bohole batho le a ntseba, ke mo thwi ka toropong mo ke godišeditšwego. Ebile ga ke ne thuto ya sekolo sa popopolelo. Yeo ke therešo tlwa. Gomme le ntsebile botelele go lekanelo, ke a holofela ke phetše pele ga lena go le laetša gore ke a botega le go hlokokafala. Ga ke moikaketši. Le baswaswalatši ba ka ga ba bolele seo. Ba, ba no re, "Ga o—ga o moikaketši, eupša o no ba phošo bonolo. O no ba phošo go se tsebe, e sego ka boomo." Ga ke nagane gore ke phošo ka go se tsebe, ka gobane Lentšu la Modimo le paka ka Molaetša wa ka, gomme Le swanetše go le botša Lona ke Mang. Gomme le nkwa gabotse ke bolela gore Lona ga se nna, kafao gona Le swanetše go ba Yena. A ke nnete? Gona ebang le tumelo ka go Modimo. Lebelelang ka tsela ye, gomme le dumele Modimo. Ge le ka kgona go dumela Modimo, Modimo o tla le fa.

Ge A ka kgona go dira seo go swana le ge A dirile pele, gona O sa le Modimo. A le dumela seo?

<sup>146</sup> O a se dumela? Mohumagadi a dutšego mo pele ga ka, a ntebeletše, megokgo ka mahlong a gagwe, ka tlhokofalo. Ga ke tsebe gore ke mang, ga se ka ke ka mmona. Ke nna mosetsebje go wena. A o a nagana Modimo o tseba sephiri sa pelo ya gago, ditlhologelo tša gago, goba sebe sa gago, goba e ka ba eng e lego sona? A o nagana O a tseba? A o nagana A ka utolla go nna se e lego sebe sa gago, se o se dirilego, se o bego o se wa swanelo go be o se dirile, goba tlhologelo ya gago, e ka ba eng e lego sona? Ge A ka e dira, a e ka go dira o Mo dumele, go tseba gore e swanetše go ba Yena? A o ka e amogela bjalo ka Yena? Ga se sebe sa gago se go tshwenyago; o ipoletše seo. Eupša o nyaka kolobetšo ya Moya wo Mokgethwa wa Gagwe. O tla O amogela. Ke O bone o sepelela fase go mo kgabaganya.

<sup>147</sup> Gore le tsebe gore ke lebeletše go mosadi, o be a ntebeletše, ke nyaka go le laetša Moya wo Mokgethwa. Lebelelang mo, thwi bokagodimo ga mosadi yo monnyane yo a dutšego mo, fase ka tlase ga maoto a ka mo. Ge ke boletše seo, seo ke selo sa go swana a se nyakago, ke kolobetšo ye ya Moya wo Mokgethwa. A o a dumela gore o tla O amogela, kgaetšedi? Phagamišetša seatla sa gago godimo, gona. Ga se ka ke ka bona mosadi ka bophelong bja ka, ka go tseba.

<sup>148</sup> Bonang monna yo a dutšego mo ka hlogo ya gagwe fase, o dutše thwi fao, ka kholoro ya go se mo lekane, le go ya pele. O tlaišega ka bothata bja sebudula. A o a dumela gore Modimo o tla go dira gabotse? Phagamiša seatla sa gago godimo ge o tla O amogela. Go lokile, Modimo a fe kgopelo ya gago.

<sup>149</sup> Lesogana le le dutšego thwi mo, le nyakago kolobetšo ya Moya wo Mokgethwa. A o a dumela Modimo o tla go fa Wona; mohlomphegi, ka thai ya gago ye tšhweu ya lenti e lekeletše morago? Modimo o tla e fa.

<sup>150</sup> Monna yo mo o rapelela mosadi wa gagwe. O ka lefelong. A o a dumela Modimo o tla mo fodiša, a mo dira a be gabotse? O a e dumela? O ka ba le yona.

<sup>151</sup> Ka seatla sa gago godimo ga mogolo wa gago, a o a dumela gore Modimo a ka kgona go fodiša seemo seo sa pelo se go tshwenyago, bothata bjoo bja teng o nago nabjo? O dutše fao, o a tlaišega thwi bjale. A ke nnete? A o a dumela O a go fodiša? Gona o ka kgona go ba le yona. Amene.

<sup>152</sup> Le a bona O a swana maabane, lehono, le go ya go ile. Botšišang batho bale, bonang ge eba ke a ba tseba. Ga ke, eupša O a dira. Amene. Bonang Seetša sela ka lehlakoreng la leboto mošola, se lekeletše thwi fase godimo ga monna yo a dutšego fale. O tlaišega ka seemo sa mongetsane ka mokokotlong wa gagwe. Ga a tšwe mo, o tšwa Georgia. Mna. Duncan, dumela ka pelo

yohle ya gago, Modimo o tla fodiša bothata bjoo bja mokokotlo. A o dumela ka pelo yohle ya gago? Modimo a go šegofatše.

<sup>153</sup> Monna šo o dutše morago mo, ka bothata bja mokokotlo, o ntebeletše. Ga ke mo tsebe, eupša ke Mna. Thompson. A o a dumela? Phagamela godimo, mohlomphagi, morago moo, gore... Ke nna mosetsebje go wena. Yeo ke nnete. Eupša o dutše moo, o a rapela. Bothata bja gago bja mokokotlo bo fodišitšwe bjale. Jesu Kriste o go dira o be gabotse.

<sup>154</sup> “E tla ba Seetša feela e ka ba ka nako ya mantšiboa.” A ga le bone, O mo bosegong bjo! Ke Yena KE NNA yo mogolo. O a swana maabane, lehono, le go ya go ile. A le a e dumela? A le kgotsofetše le go kgodišega go re yo ke Jesu Kriste a dira Yenamong go tsebja, a itsebagatša Yenamong ka go seprofeto?

<sup>155</sup> Se tshwenyege ka leihlo. Modimo o fodiša balwetši le batlaišwa.

<sup>156</sup> Ke batho ba bakae bao...ke ba bakae ba lego ka mo, ba babjago? A re boneng diatla tša lena. Go no bonala o ka re e no ba go goga le go ngangega. A e ka ba ba bangwe ba lena batho ba na le dikarata tša thapelo? Ga ke tsebe ke ya go le tliša bjang go kgabola mo. Ke nyaka go le rapelela, gomme ga ke tsebe mokgwa wa go e dira. Le a bona eng, lebelelang leboto, ke ya go ba tliša bjang ka kua? Go ka reng ge o hwetša mokgoba wo mongwe o pitlagane? O hwetša wo mongwe o thibegile thwi kua, yo mongwe le yo mongwe o eme tse.

<sup>157</sup> Theetšang, nkweng. A nkile ka le botša e ka ba eng ka Leina la Morena eupša se se tīlego go phethega? A ke nnete? Se sengwe le se sengwe ka mehla se bile gabotse. Ga se ka ke ka le kgopela peni ye e itšego ya tšhelete ka bophelong bja ka, a nkile? Ga go nako e tee. Ga se ka ke ka tšea moneelo ka bophelong bja ka. Ga ke mo bakeng sa tšhelete. Ga ke mo go le fora. Ke mo go bonagatša Lentšu la Modimo la iri. Ke le boditše Therešo, gomme Modimo o pakile gore ke Therešo. Bjale ke a le botša, GO RIALO MANGWALO, gore ge modumedi a bea diatla godimo ga molwetši, Jesu o rile, “Ba tla welwa ke maruru!” A le dumela seo? Gona, ka Bogeneng bja Modimo, a ga le dumele O tla e dira bjale?

<sup>158</sup> Bjale beanang diatla seng sa lena, gomme e no se swara fao motsotso. Bjale, o se ke—o se ke wa rapela, nong go beana diatla seng sa lena; ntle fao ka nageng. Gomme nna, ka bonnamong, ke ipea nnamong godimo ga disakatuku tše. Bjale ke le nyaka le lebelele go nna motsotso feela. Ke eng se Modimo a se tlogetšego se se sa dirwa? Lebelelang ka fao A lego, se Lentšu le re le badilego, diprofeto tše re di boletšego, gore Jesu o itsebaditše Yenamong ka go diprofeto. Bjale lebelelang iri, le dibeke tše tharo tše tša go feta mo re beilego iri ye re e phelago. Lebelelang se re se badilego, go ka reng ka baprofeta ba maaka le e nyakile go ba maswao ao a ka forago bakgethiwa. Ka fao Lentšu le bonagaditšwego, ka fao modimo wa lebaka le a foufaditšego

maaka...dipelo tša batho. Le ka fao Modimo Yenamong a boletšego ka diprofeto tša Gagwe gore dilo tše di be di tla direga ka go Lebaka le la Laodikia. Ga go selo se tlogetšwego se se sa dirwa. Modimo o mo Modimo wa go no swana yo a boletšego le batho bale ba Emause, yo a itsebagaditšego Yenamong ka diprofeto tše di boleletšwegopele go Yena, O mo bosegong bjo o tsebagatša Bogona bja Gagwe ka diprofeto tše di boleletšwegopele go lebaka le. O a swana maabane, lehono, le go ya go ile. A le ka kgona go e dumela? Gona beanang diatla seng sa lena. O se ke wa ithapelela wenamong, eupša ka tsela ya gago mong rapelela motho yoo yo o nago le diatla tša gago godimo ga gagwe, ka gobane ba a le rapelela. Bjale lebelelang, le se ke la belaela.

<sup>159</sup> Gomme bjale ge le ka kgona go bona se ke se lebeletšego! Gomme le a tseba nka se le botše maaka, ke eme mo. Ge le ka kgona go bona, le tumelo ya lena ya kgona go goga Moya wo Mokgethwa wo mogolo wola wo o bego o sesa kua moyeng—moyeng, wo saense e tšerego diswantšho tša wona, le go O bona o sepela go kgabola moago wo o no leka go hwetša lefelo go—go kotama, o leka go hwetša lefelo go kgwaparetša. O dumele feela, ngwanešo wa ka. O e tsebagaditše ka Lengwalo le go ya pele, gore ke nnete. Bjale rapelela motho yoo ka tlhokofalo yo o nago diatla tša gago godimo ga gagwe, ba a go rapelela.

<sup>160</sup> Morategi Jesu wa Nasaretha, gabaneng, re a lemoga, Morena, ka Lentšu, gore O mo, ka tshepišo gore O mo, "Kae kapa kae ba babedi goba ba bararo ba kopanego ka Leina la Ka, fao Ke magareng ga bona. Gomme maswao a a tla ba latela ba ba dumelago; ge ba Bea diatla tša bona godimo ga balwetši, ba tla welwa ke maruru." Ntle ka go maphotho a mogala wo, a nke Moya wo Mokgethwa wo mogolo o ye ka go phuthego ye nngwe le ye nngwe. A nke Seetša se Sekgethwa sa go swana se re se lebeletšego thwi ka mo kerekeng, a nke Se wele godimo ga yo mongwe le yo mongwe, gomme a nke ba fodišwe ka nako ye. Re kgalemela lenaba, diabolo, ka Bogeneng bja Kriste; re re go lenaba, gore o fentšwe ka—ka tlaišego ya kemedi, lehu la Morena Jesu le tsogo ya phenyo ka letšatši la boraro; gomme bohlatse bja Gagwe bja go netefatša gore O mo magareng ga rena bosegong bjo, o a phela, morago ga mengwaga ye makgolo a lesomesenyane. A nke Moya wa Modimo wa go phela o tlatše pelo ye nngwe le ye nngwe ka tumelo le maatla, le bokwala bja phodišo go tšwa go tsogo ya Jesu Kriste, Yo a tsebagaditšwego bjale ka Seetša se segolo se se dikologago kereke, ka Bogeneng bja Gagwe. Leineng la Jesu Kriste, e fe bakeng sa letago la Modimo.

<sup>161</sup> A nke disakatuku tše re rapelago godimo ga tšona, a nke di ye go balwetši le batlaišegi ba di ba nepilego. A nke Moya wo Mokgethwa wa go swana wo o lego mo bjale o tsebagatšago Yenamong, o tsebagatše Yenamong go molwetši yo mongwe le

yo mongwe yo tše di bewago godimo ga gagwe. A nke Bogona bja Modimo bo tlatše pelo ya bona bjalo ka tumelo go fihla go babja ga mmele wa bona go tla fodišwa. Se re se kgopela, bakeng sa letago la Modimo, ka Bogoneng bja Jesu Kriste le Leineng la Jesu Kriste, bjalo ka ge rena bahlanka ba Jesu Kriste re e kgopela. Amene.

<sup>162</sup> Bjale go tšwa dipelong tša lena, ga ke tshwenyege bothata e be e le eng ka wena, a o ka kgonà, go tšwa pelong ya gago, go dumela ka pelo yohle ya gago gore Lentšu la Modimo le file kgopelo ya gago? [Phuthego e re, "Amene."—Mor.] Ke a dumela gore seatla se sengwe le se sengwe, bjalo ka ge ke kgonà go bona, se ile godimo. Ge o e dumela, bjale eelwa, go fedile.

<sup>163</sup> Lena ntle fao mathaleng a mogala, ge le dumetše ka pelo yohle ya lena, ge badiredi ba beile diatla godimo ga lena, le baratwa ba lena ba beile diatla godimo ga lena, ge le dumela ka pelo yohle ya lena gore go fedile, go fedile. Moya wo Mokgethwa wo mogolo, O mo ka tabarenekeleng bošegong bjo. Ke Mmone a sepela godimo ga batho, a iponatša Yenamong godimo mo ka thoko ga leboto, gomme o ile tlase godimo ga monna, o tlide tlase mo le godimo go kgabola moago, go dira go tsebjà ga diphiri tša dipelo, boitsebišo bja Bogona bja Gagwe, go laetša gore O a swana maabane, lehono, le go ya go ile. O magareng ga rena! Yena ke Modimo, Modimo yo a sa tsogego a šitilwe.

<sup>164</sup> Gomme a dipelo tša rena ga tša swa ka gare ga rena, gomme a ga e swe bjale, go tseba gore bjale re ka Bogoneng bja Jesu Kriste yo a tsogilego, go Yena go be letago le tumišo go ya go ile; Yo a lego ka seswantšho se se hlagišitšwego sa Jehofa Ramaatlakamoka; Yo a sesetšego fase ka sebopego sa Pilara ya Mollo ka sethokgweng se se tukago, go goga šedi ya moprofeta; Yo a theogetšego godimo ga thaba, gomme mang kapa mang a bego ebole a ka e kgwatha o be a swanetše go bolawa, ntle le Moshe le Joshua. Kafao A eteletsegopele bana ba Israele go kgabola lešoka, ka leetong la bona, bjalo ka sekai sa batho ba biletšwantle lehono. So Yena, ka diphatišio tša saense, ebole o itsebagaditše Yenamong pele ga saense. Gomme ka tšona ditiro tša Gagwe le ka sona seprofeto sa Gagwe, dilo tše di profetilwe ka Yena go di dira ka go letšatši le, go Mo dira wa go swana maabane, lehono, le go ya go ile, di hlatselwa ka go phethagala. A ga se go lekanelo go dira dipelo tša rena go swa ka gare ga rena? Modimo a le šegofatše.

<sup>165</sup> Bjale ka mmtero o tee, a re emeng gomme re re: nna bjale ke amogela Jesu Kriste bjalo ka Mophološi le Mofodiši. [Phuthego e re, "Nna bjale ke amogela Jesu Kriste bjalo ka Mophološi le Mofodiši."—Mor.] Gomme ka mogau wa Gagwe, ["Gomme ka mogau wa Gagwe,"] go tloga iring ye go ya pele, ["go tloga iring ya go pele,"] O Modimo, ["O Modimo,"] a nke gosedumele ["a nke gosedumele"] go se tsoge gwa tsena pelong ya ka, ["go se tsoge gwa tsena pelong ya ka,"] ka gore ke bone ["ka gore

ke bone”] seprofeto [“seprofeto”] sa letšatši le [“sa letšatši le”] se phethagatšwa. [“se phethagatšwa.”] Ke a dumela [“Ke a dumela”] gore Jesu Kriste [“gore Jesu Kriste”] o a phela [“o a phela”] le mo bjale [“le mo bjale”] go tiišetša Lentšu la Gagwe [“go tiišetša Lentšu la Gagwe”] la iri ye. [“la iri ye.”] Diprofeto [“Diprofeto”] tše di ngwadilwego ka Yena [“tše di ngwadilwego ka Yena”] bjale di phethagaditšwe magareng ga rena. [“bjale di phethagaditšwe magareng ga rena.”] Yena ke Mophološi wa ka, [“Yena ke Mophološi wa ka,”] Modimo wa ka, [“Modimo wa ka,”] Kgoši ya ka, [“Kgoši ya ka,”] Tšohle tša ka ka go tšohle. [“Tšohle tša ka ka go tšohle.”]

<sup>166</sup> Morategi Modimo, ekwa bopaki bja rena. Gomme re fe, tšatši ka tšatši, Borotho bja Bophelo. Gomme re Go neela tumišo, O Modimo, go tšwa mabotebong a pelo ya rena. Re a Go tumiša, Yo Maatla, Modimo wa baprofeta. Leineng la Jesu Kriste. Amene.

Oo, a nakwana, a nako!

. . . dumela feela;  
Dumela feela, e no dumela feela,  
Dilo tšohle di a kgonega, dumela feela.

A re ka e opela ka mokgwa wo.

Bjale ke a dumela, oo, bjale ke a dumela,  
Dilo tšohle di a kgonega, bjale ke a dumela,  
Bjale ke a dumela, oo, bjale ke a dumela,  
Dilo tšohle di a kgonega, bjale ke a dumela.

A bjoo ke bopaki bja lena? [Phuthego e re, “Amene.”—Mor.]  
Bjale ge re inamiša dihlogo tša rena.

Go fihla re kopana! go fihla re kopana!  
Go fihla re kopana maotong a Jesu;  
Go fihla re kopana! go fihla re kopana!  
Modimo a be le lena go fihla re kopana gape!

[Ngwanešu Branham o thoma go hama *Modimo A Be Le Lena*, morago o bolela le Ngwanešu Neville—Mor.] A o nyaka go bolela se sengwe? Vayle.

. . . maotong a Jesu;  
Go fihla re kopana! go fihla re kopana!  
Modimo a be le lena go fihla re kopana gape!

<sup>167</sup> Ka dihlogo tša rena di inamištšwe, Ngwanešu Vayle o eme mo go re phatlatalatša ka thapelo. Ngwanešu Lee Vayle, ke mongwadi wa tabarenekele mo, wa dingwalwa le dipuku, le go ya pele. Ngwanešu yo bohlokwa kudu, o bile le nna go masolo a mantši. Ke duma ge nkabe ke na le sebaka go dumelala modiredi yo mongwe le yo mongwe, go ba emiša mo le go bolela le bona. Le a kwešiša, ke na le nnete. Modiredi yo mongwe le yo mongwe, re thabile go ba le lena mo. Maloko wohle, batho ba dikereke tša go fapania, eng go fetiša, re thabile go ba le lena mo. Gomme ka therešo ke thapelo ya rena seng sa rena, “Modimo a be le lena

go fihla re kopana gape.” Ka dihlogo tša rena di inamišitšwe, le diatla tša rena di phagamišitšwe, a re opeleleng Modimo gape gabosana.

Go fihla re kopana! go fihla re kopana!  
Go fihla re kopana maotong a Jesu!  
Go fihla re kopana! go fihla re kopana!  
Modimo a be le lena go fihla re kopana gape!



*DITIRAGALO DI HLAKIŠWA KE SEP PROFETO* NST65-0801E  
(Events Made Clear By Prophecy)

Molaetša wo ka Ngwanešu William Marrion Branham, setlogong o abilwe ka Seisimane ka Lamorena mantšiboa, Agosetose 1, 1965, ka Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya maknene gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)